

明三十家詩選 四

智

陳子龍
顧卷武
陸世儀
陳元孝

六十首
四十四首
六十四首
四十四首

柳田文庫

文庫11

D 173

4



文庫 11
D 173
4

明三十家詩選初集卷七上

錢塘 汪 端 允莊輯

陳子龍 六十首

子龍字人中更字臥子青浦人或作華亭人父所聞工部

郎中有廉直聲公生時母韓夫人夢龍降於室故名

幼尚氣節嫉惡若仇詩文瑋麗當復社名盛與同郡

夏允彝徐孚遠李雯宋徵輿等結幾社遙相應和舉

崇禎丁丑進士出漳浦黃石齋之門選紹興推官攝

諸暨縣事邑向苦水災盜賊蝟起公以計擒其渠誅

之民賴以安又議積儲以為積於官則多弊不若藏

於民間因令富室各量力書所積之數於籍至米貴



010190557770

時則減價以糶歲稔則聽自便逾年大飢越郡雲擾獨暨邑帖然大吏遂屬公專司賑事前後所全活者十餘萬人崇禎十五年舉天下廉卓第一率兵剿閩浙山賊於遂昌山險籌密前此官兵進討多失利公激厲將士於溽暑瘴霧中深入死鬪奪其一寨賊西走所棲益峻不可攻公令凡近賊巢五十里內民家牛羊米粟皆遠徙之賊乏食勢屈遂出降東陽許都者副使達道孫也爲諸生任俠好施多結豪悍公素知之語當路曰此等人用之可得其死力不用亦能爲變人無應者時東陽令姚孫棐貪縱虐下有奸民假中貴名招兵者都無涉也事發令文致之因以索

賄不滿所欲持之益急適都葬母山中會者萬人或告監司王雄曰都反矣雄遽遣使收捕都因發憤舉兵以誅貪吏爲名旬日之間衆至數萬連陷東陽義烏浦江圍金華全浙大震巡撫董象恒時坐事被逮代者未至巡按左光先以撫標兵命公爲監軍討之公遣別將從間道繞出賊後焚其巢賊遂奔潰進擊之俘斬數百人收復義烏兵士有取民間一銅器者公立斬之進屯雙林寺時游擊蔣若來已擊破都圍婺之兵都收餘衆三千人保南砦遣使乞降於公公以事重不許及各路兵會王確謂公曰賊聚糧據險非曠日持久不能克我兵萬餘止五日糧奈何賊若

悔禍因而撫之戢兵救民計之上也公曰某與都有舊請往察之乃單騎入都營責數其罪諭令歸降待以不死遂挾都見雄復挾都入山散遣其衆以二百人降而光先與東陽令善竟斬都等六十餘人於江潁公力爭不聽以定亂功擢兵科給事中命甫下而闖寇勢日熾逼京師公上書南大司馬史忠正公可法欲其間道密奏請太子從津門入海南發三吳則集水師萬人乘南風直抵碣石奉迎之史深然其說事未行而京師陷福王監國南都以原官召用公入朝卽上疏言防江之策莫過水師海舟之議更不可緩請專委兵部主事何剛訓練從之又言自古中興

之主莫不身先士卒故能光復舊物未有深居宮闈優游處順而可以戡定禍亂者也今入國門再旬矣人情泄沓不異昇平從無有哭神州之陸沉念中原之榛莽者臣瞻拜諸陵依依北望不知十二陵尙能無恙否而先帝先后之梓宮何在興言及此陛下宜嘗膽臥薪宵衣旰食而羣工庶尹亦宜砥礪鋒鏑奮發志意以報仇雪恥是務庶中原可收而舊京可復也又上備邊三要及經畧襄陽布置兩淮之策王不能用會馬阮專政引用邪黨公居言路五十日諫疏凡三十餘上並不聽羣小側目思中傷之公知時事不可爲以葬親乞歸許之遂不復出乙酉南都失守

王師圍松江公集衆結營泖湖間軍號振武與夏忠節公允彝爲城守計而所募多市人不習戰又缺餉城遂破夏公自沈於松塘口公念祖母高夫人年九十無侍養者變服逸去居嘉禾之水月菴爲僧名信衷字瓢粟又號潁川明逸時扁舟往來吳越間及唐魯兩王稱監國於閩浙閩中遙授公兵部左侍郎左都御史浙中授兵部尙書節制七省漕務高夫人卒公欲間道奔赴海上邏禁方密不果行閩浙旣破公志不欲生奉祖母柩還松葬於富林自此廬居屏絕人事門人張寬王澐徐桓鑒從焉公爲書數千言焚夏公墓前具述已所以不卽引決之故詞極悲慨

丁亥四月松江提督吳勝兆者與巡撫土國寶交惡心不自安長洲諸生戴之雋爲其客說之舉兵結舟山大帥黃斌卿爲外援勝兆嘗浮慕公遣之雋夜謁公丙舍約共事公言海上虛聲寡信事必無濟之雋固請公義不忍拒乃聽之旣而斌卿兵久不至勝兆謀亦洩爲其下檻致南都執之雋等十餘人殺之國寶謀乘此盡除三吳知名之士窮治其獄詞連公公走嘉定告急於侯岐曾匿其僕劉馴家已遷崑山顧天達所國寶及操江陳錦遣兵大索得之旣見抗辨不屈繫之舟將解南京至跨塘橋斷索躍入水中死時 國朝順治四年五月十三日也年四十王澐徐

桓鑒及公輿人吳酉潛覓其屍殮之歸葬富林時以
匿公死者侯岐曾一門顧成正子天達天遴張寬夏
之旭也公夫人張子婦丁孫婦張俱以苦節顯乾隆
四十一年 詔褒勝國殉節諸臣公專謚忠裕所著
詩文有岳起堂稿采山堂稿幾社稿陳李倡和集屬
玉堂稿平露堂集白雲草三子新詩湘真閣稿焚餘
草又輯明代名人之文有涉世務國政者爲經世文
編凡五百餘卷又有皇明詩選史拾載補諸書多散
佚不傳嘉慶癸亥青浦王少司寇昶及同郡人士搜
訪彙集得賦二卷詩十七卷詞一卷文十卷并公自
撰年譜二卷王澐所撰乙酉後年譜一卷何其偉刻

之

宋尙木曰臥子體格高渾卓然盛唐大家之作

李舒章曰臥子論詩以爲詩貴沉壯又須神明能沉
壯而無神明者如大將統軍刁斗精嚴及其鼓角旣
動戰如風雨而無旌旆悠揚之色有神明而不能沉
壯者如典午名士握麈談道望若神仙而不可以涉
山川冒險難此英雄之分也以樂府古詩論之曹孟
德雄而不英曹子桓英而不雄而子建獨兼之以唐
詩論之高達夫雄而不英李東川英而不雄王右丞
則英中之雄岑嘉州則雄中之英而子美獨兼之此
臥子之才縱橫間出凡此諸家命意卽合而獨於二

子深有崇尚也

魏楚白曰臥子五古初學漢魏中學大謝能於質悶之中兼以俊秀信是雅宗

朱錫鬯曰王李教衰公安之派浸廣竟陵之燄頓興一時好異者譁張爲幻如帝釋旣遠修羅藥又交起搏戰日輪就暝鵬子鴉母四野羣飛黃門張以太陰之弓射以枉矢腰鼓百面破盡蒼蠅蟋蟀之聲其功不可泯也觀其與李宋二子選明詩自序畧云一篇之收互爲諷詠一韻之疑互相推論攬其色矣必準繩以觀其體符其格矣必吟誦以求其音協其調矣必淵思以研其旨於是郊廟之詩肅以離朝廷之詩

宏以亮贈荅之詩温以遠山藪之詩深以遠刺譏之詩微以顯哀悼之詩愴以深使聞其音而知其德省其辭而推其志先生之論詩知所本矣
王貽上曰明末國初歌行有三派虞山源於杜陵時近眉山大樽源於東川參以大復婁江源於元白而工麗過之又曰黃門七律沉雄瑰麗真冠古之才一時瑜亮獨有梅村耳

陳伯璣曰癸未冬余避亂金陵羅公萬象謂余文人談經濟罕覩其效昨陳臥子從紹興督軍糧七萬餘石至遂免此中脫巾之呼真濟世才也余心識之明日謁陳公於承恩寺所言皆機務絕不論文座中桐

城友人偶言其鄉社事水火欲公收回所撰某某序
文公曰天下何等時正當換小羣爲大羣柰何意氣
若此余退而益歎服公之慷慨激烈非僅文人比也
其大節不具論如元黃之戰至今猶紛拏未已安得
聞公長者之言乎

王勝時曰先生座師漳浦黃公贈言有云愛物若騶
虞指佞如屈軼先生嘗榜之座右故自號軼符

鈕玉樵曰陳臥子負海內重名柳如是欲委身焉從
盛澤至松屢以刺謁自稱女弟陳嚴正不易近因歸
於虞山錢蒙叟

汪端論曰忠裕詩襟懷宏邁天骨開張立赤幟爲雅

宗挽狂瀾於旣倒諸體皆鎔鑄古調而神理自存如
臨淮將郭令軍營壘旌旗忽焉變色其論詩宗旨雖
以七子爲歸然國變以後之作激昂沉著恐王李諸
人皆瞠乎其後矣而崑山吳氏圍爐詩話因痛貶王
李遂敢集矢於公豈非妄人哉○集中七律最爲擅
場然著色太濃處未免大陸才多之累茲錄其意格
渾雅者

三洲歌

相送巴陵口含淚上行舟不知三江水何事亦分流

小車行

小車班班黃塵晚夫爲推婦爲輓出門茫然何所之青青

者榆療我飢願得樂土共哺糜。風吹黃蒿望見垣堵中有
主人當飼汝叩門無人室無釜躑躅空巷淚如雨。沈確士
云寫流

人情事恐鄭監
門亦不能繪

怨詩行

此詩弔唐王韋鍾妃會氏也
閩中破王被執妃赴水死

九江倒影揚素波。洞庭微風鳴白鼉。文狸赤鯉迎湘娥。翠
竹泠泠蒙女蘿。重華一去不復還。愁雲萬古蒼梧山。五臣
八凱竟誰在。空令帝子凋朱顏。凋朱顏墮綠水。不見軒轅
神鼎成。黃金如山映天紫。日月光華閩闔開。飛龍半負嬋
娟子。玉笙杳渺流雕雲。升天入地皆隨君。小臣徒望青冥
哭。天路茫茫竟不聞。

平陵東

炎精中燼妖彗紅。平陵松柏生秋風。四十萬人頌符命。巨
君却在層城宮。東郡太守建旗鼓。排山動地連闕輔。五威
國將紛東馳。大誥金滕亦何補。洿宮薦棘雖無成。天下始
知稱漢兵。不逢時會豈失策。猶與宛雒開先聲。斗柄橫斜
漸臺感。白水真人坐黃屋。逢萌束帛卓茂封。義公碧血無
人哭。男兒何必上雲臺。千古同悲兩黃鵠。沈確士云義公
勝廣之開漢祖而光武之封不及
何也不以成敗論人具有卓識

厲言

江東有穢鳥。自名為禿鷲。食魚徒滿吭。毛羽終可羞。其或
所立渚。鷗鷺必遠投。何來一蒼鷹。鐵羽黃金眸。雖非高尚
姿。猶任搏擊謀。不作摩天飛。下集滄江流。側身就鷲飽。比

翼相遨遊。未流安可居。貴賤各自求。所以老鶴心。傲然橫高秋。此刺當時有言責而與小人比者也

仲夏直左掖門送彝仲南歸

金塘迴素波。中有雙鴛鴦。託身在清禁。和鳴君子旁。人生會有別。孤翼忽南翔。顧此同林鳥。安知天路長。平生志慷慨。何事獨難忘。本爲四海人。豈得長相將。丈夫重知己。萬里同芬芳。黽勉効貞亮。德輝在巖廊。莫憂青蠅多。和璧貴善藏。執手不能語。悵矣結中腸。

雜詩

朱夏芳未歇。歷落懷長林。黃鳥鳴交柯。玄蟬翳清陰。習習涼颺至。吹我綠綺琴。牙曠雖已遠。邱中留令音。處羣生靡態。獨立凝貞心。遺慮繁景外。抗志高山岑。世度傷局促。賢達任浮沈。

日夕登高臺。馳目窮萬里。衆星燦雲間。經緯誰能理。神哉玉衡運。天樞無終始。上有瓊瑤宮。紫皇日端委。我欲乘飛鸞。銜書碧雲裏。聲抗塗愈遐。心長情何已。懷中五色石。相見徒磊磊。

山椒微風發。薄暮遲佳人。頽陽澹林表。素月生河津。佇立懷往路。時晏多苦辛。君家青雲樓。瑤華艷當春。臯蘭亦有芳。欲寄良無因。歡愛豈足重。要使恩誼申。浮雲誠易阻。白璧終見珍。

逐時多近娛。邁古懷長憂。高節勵貞亮。芬芳耀千秋。日月

逝逾疾。我生獨何求。烜赫邀世榮。傾側遞相仇。威蕤丹山鳳。逍遙凌九州。一鳴簫韶奏。再鳴商為周。顯晦隨景運。難與燕雀謀。曠哉唐虞際。念此心悠悠。

至道無相非。末流乖心迹。高懷苟不亮。執疑日以積。賢隨貴同用。愚與賤交役。騰名自有階。投讒豈無隙。營營棘上蠅。可以遺金石。履繩思寡尤。超方鮮奇策。毀譽苟未忘。顧影慙跼踖。

朱笠亭云深於閱歷之言

尚口自有窮。捫舌豈我欺。伊予味機變。率性不自知。遇物皆衷言。當險若履夷。於已固勿慎。安望人保持。俯仰生平內。常與悔相隨。沈默苦不蚤。壯盛忽若馳。世人貴形迹。君子敬威儀。臧否聖所誠。南容真我師。

墓門有惡木。柯幹何連卷。良士不肯蔭。鴟鵂巢其巔。同茲雨露潤。不與百卉妍。性質固有殊。大造安能遷。我行適見之。中心懷憂悵。利斧雖在手。斬伐無此權。去去保芳潔。願言藝蘅荃。諸詠醞釀深厚說理不腐品居嗣宗康樂之間

陟桐巖嶺

馳游自忘倦。遇險若貽安。尋源無盡澗。躋峻轉餘巒。千盤上風磴。百尺啟雲關。丹楓媚綺麗。碧嶂竦巖岏。含霧林樾潤。翳日藤蘿寒。回視萬壑底。更見羣峰攢。升喬意凌越。憑虛神汗漫。術阡布霞路。間井出人間。懷靈豈存境。觀道託殊觀。獨立招予美。痗矣摧令顏。

蘭溪

水宿澹容與。晨興曠游目。輕噉麗平沙。碧雲蕩澄淥。縹緲
託襄賢。躑躅悲殉祿。柔漿緒風外。虛舟陰崖麓。峭嶺寫層
淵。滌洄亂喬木。清霜紛被練。薄霞復染縠。翠羽掠明鏡。紅
泉激哀玉。願攀蘭江佩。相依湘水曲。迢迢迷往路。紆軫思
芳躅。山阿遲幽人。遐心俟嘉告。

贈孫克威

孫郎歷落天下才。龍文手握雙玫瑰。自言三卷授黃石。談
兵說劍如風雷。時與少年四五輩。呼鷹走馬登高臺。春風
初綠長。干草白。門柳花飛滿道紅。妝落日。醉輕霞影寫清
淮金。驟。裹酒酣拔劍爲我歌。結交賢豪苦不早。鄂渚風烟
亂素秋。千帆鬪艦上荊州。上客重題鸚鵡賦。書佐還陪明

月樓。數行能折虎牙將。一言叱咤龍額侯。嘆息我謀適不
用。歸來仍典驢。驢裘錢塘八月與君遇。慷慨猶存肝胆露。
明河欲墮西。冷橋疎鐘半。暝南屏。樹十年。衰亂難重陳。把
酒相看淚如雨。皓齒青蛾委路塵。淮水長江尙東去。君家
哲兄多雄風。擁師十萬鎮雲中。今年逐敵來盧龍。天子賜
譙明光宮。何不拂君大羽箭。仰天一射天山空。第五之名
比驃騎。指揮萬里平諸戎。黃河鯉魚紅撥刺。長安故人素
書至。白波惡浪高於山。焚林觸石知何意。千古終無廉藺
徒。眼前惟見蕭朱事。軒冕甘爲五鼎烹。壯士翻爲二桃棄。
以之塵世難盤桓。掉頭烟海空漫漫。子學任公垂釣竿。子
亦逢萌早掛冠。天陰野曠龍蛇蟄。雲高日薄鴻雁寒。此行

倚把浮邱袖。翠羽金支掃石壇。

豪放適宕不在太白下

寄獻石齋先生

烈風蕭條吹百羽。朱鳳葳蕤適南土。羅畢如雲不見天。秦人高歌楚人舞。出門不向妻子辭。八尺銀瑤五色組。虎鬚校尉紅錦裘。峩舸大艫下江州。蛟龍娟娟碧沙靜。日月冥冥青楓秋。赭衣墨幘安魚服。予亦相逢淮水曲。京華時事不足論。慘淡相看日彌促。鎌刃誰留門外。蘭庖廚肯恕山中。鹿可憐。舉世學浮沉。燭龍迴照杳難尋。蒼茫不解時人意。愛護還憑明主心。我有短札置懷袖。安能一矢千黃金。平生風義慙師友。陳蔡相從但鼓琴。沈確士云此石齋被逮黃門遇之淮南而作

雷驚門開翡翠城。鳳皇十二相和鳴。碧血一灑玉階裂。驚

雷急電何時平。門生往往自引匿。故吏不復來通名。賈彪

奔走何側起。曹鸞上書翻桎梏。謂葉餘諸公也鉤連幾作甘陵部。

相將同入黃門獄。緋衣獄吏行生風。黃封小匣排當中。更

番榜掠不知數。但稱汝罪如山崇。小臣萬死不足惜。聖德

如天輝簡策帶血。晨興寫孝經。和柳夜臥編周易。爰書一

旦下高天。薄譴由來湘水邊。萬里聞聲頌明聖。漢廷有待

賈生還。沈確士云此指石齋自詔獄得戍西陽而作帶血晨興寫孝經二語自是當時寔事

塞下曲

頻年出漢將。六郡徙良家。雪積黃河岸。風高青塚沙。羌童彈鳥鼠。燕女弄琵琶。別部天山外。分兵逐渾邪。

揚州

江南年少子。處處逐青娥。怕問雷塘事。終憐水調歌。牙檣
淮雨暗。玉管楚聲多。夜半城頭角。飄零怨紫羅。凄怨如讀
燕城賦

送楊扶曦之湘陰令

君當春草去。幾日到長沙。雁影衝寒火。猿啼落晚花。孤城
湘水濶。畫舫洞庭斜。為政風流地。天南不憶家。

諸將

明主憂時急。會聞上將才。尚方星劍動。勅使虎旗來。莊賈
誅猶晚。揚干法未裁。貂蟬諸帥滿。何計畫雲臺。

三秦通楚塞。鼓角畫猶鳴。荆棘交千里。風塵鎖百城。亦知
悲寇盜。不敢望官兵。難息烝黎痛。殷憂賴聖明。此指陳奇
瑜熊文燦

等坐擁重兵。玩寇自恣。孫白谷盧九台等足以平賊而
而阨于讒臣國事至此已不可為公言之有餘恫矣

石齋先生築講壇於大滌山即玄蓋洞天也予從先

生留連累日

明湖連暮靄。積翠萬重山。九折泉聲亂。千峯雲氣閒。尋真
窮石室。卜築掩松關。尚有蒼生慮。高談夜未還。

舟發金陵宿儀真

三月風濤暮。滄江萬里情。浮雲生采石。春色斷蕪城。淮甸
開王服。吳關鎖舊京。烏啼今夜月。分得故園明。

桃源夜遇鄭超宗落第還維揚

相逢班馬鳴。三月出王京。秉燭黃河岸。悲歌下相城。風雲
雙闕暗。花柳半江明。突兀金臺上。知君最不平。

汶上

海岱色蒼然。風迴萬木連。雲深鉅野澤。雨隔汶陽田。歸燕愁兵氣。勞人惜壯年。何來遊俠子。羨爾玉爲鞭。

交河

烏啼征馬動。曙色散滹沱。海氣通三島。天風靜九河。沙平邊草斷。日淡塞雲多。百里無烟火。空邨客自過。

秋歸涉黃河

揚舲濁浪起。掛席晚風多。氣壓清淮水。沙橫滄海波。秋陰沈大野。落日蕩長河。繁吹生遙夜。中流發櫂歌。

雜感

大河南北望。萬里入春愁。車馬空官渡。風烟滿豫州。黃巾

連戶著白骨。少人收。自古中原地。應煩聖主憂。

兵戈傳劍外。消息每差池。已失夔門險。誰言蜀棧危。雪山

寒鼓角。玉壘暗旌旗。天子頻西顧。元戎實總師。沈確士云此楊嗣昌

總師時也夔門失而蜀道不可守矣喪師辱國伊誰之咎哉

越署早春

春山雪後明。黛色滿江城。風轉林花發。霞蒸海氣平。管絃催暮靄。樓閣動新晴。越客登臨處。浮雲日夜生。

襄陽

江漢西陲重。荆襄南紀雄。諸侯悲峴首。耆舊失隆中。燧色通秦塞。妖星下楚宮。不知大隄女。何處舞春風。似元遺山

孟冬宿柴石上人精舍

上方通竹徑。殘月照匡牀。烏雀喧初曙。松杉落曉霜。有山還種桂。無海不栽桑。莫測升沈理。相攜問法王。

避地示勝時

跼蹐三年內。蕭條一概中。刺船排急難。贈策想雄風。北海孫賓石。東吳皋伯通。比來還寂寞。此義有誰同。

廬居

行遯山河改。歸來松菊荒。尙餘三畝宅。無復萬家傍。祈死煩宗祝。偷生愧國殤。但依親隴在。含笑此高岡。沈至處驚心動魄

感懷

神京弈弈古幽州。紫禁烟雲屬御樓。天子新添太府寺。羣臣多拜大長秋。簿書衡石皆秦吏。封事飛霜半楚囚。奏對

即今誰便殿。幾人江上自披裘。此指崇禎初中官張彝憲等任事及殺袁崇煥成錢

龍錫之事

中原側首半蓬蒿。丁壯江南盡輓漕。武備向推河朔勇。寇來無復太行高。聖明倚重惟金部。海內經營恃賊曹。若有玉揚能事主。何煩桑孔計秋毫。此指崇禎三年從兵部尚書梁廷棟之言加派田賦

海內各怨之事

經王粲墓

斷風吹草雜寒流。一代才華在古邱。鄴下文人誰彊記。秦川公子獨多愁。從軍神武終依魏。作賦悲涼且事劉。當日英雄俱寂寞。漢南漳北暮雲秋。視飛卿陳琳墓詩雅切

長安雜詩 錄一

風塵繞繞五都前。豪俠株盤有幾年。石顯上賓居柳市。竇嬰別業在藍田。兩宮肺腑黃金內。四姓交遊駿馬邊。共請縣官爲賜第。何妨濫用水衡錢。此譏田宏遇等之豪橫也

甲戌長安元日

鐘鼓沈沈滿鳳城。五雲忽動見平明。奏箋學士宮中女。鹵簿將軍殿後兵。萬井烟花歸北里。九衢日月轉西清。卻憐河雒朝正使。尚隔風塵望玉京。自注時中州多盜郡縣免覲

李司馬萍槎先生贈詩勉以世事兼許文筆怱怱奉

酬聊存知己之感

久瞻樞府重明光。投我連城雲錦章。傷亂已聞劉太尉。賞音深愧蔡中郎。九龍移帳春無草。萬馬窺邊夜有霜。蚤晚

滄江驚驛使。詔書先問右賢王。深醇雅健入神之作

錢塘東望有感

清溪東下大江迴。立馬層崖極望哀。曉日四明霞氣重。春潮三浙浪雲開。禹陵風雨思王會。越國山川出霸才。依舊謝公攜伎處。紅泉碧樹待人來。足使滄溟低首。兼州卻步

送方爾止還金陵將歸皖桐

舊京天闕倚雲看。送客秋河振羽翰。玉樹風殘三閣暮。石城潮上九江寒。管寧避地非無策。王粲從軍強自寬。寄語皖桐新幕府。好收奇計助登壇。

送張玉笥中丞擢河道少司空隨召陞見

舊京開府靜牙璋。詔領河隄入未央。周室保釐分邾郟。漢

家底續念宣房。九天星宿穿秦塞。萬里梯航走冀方。為語
至尊南顧日。不堪重問海陵倉。沈確士
云典切

揚州

淮海名都極望遙。江天隱見隔南朝。青山半映瓜洲樹。芳
草斜連揚子橋。隋苑樓臺迷曉霧。吳宮花月送春潮。汴河
盡是新栽柳。依舊東風恨未消。

初出都門

灞橋花下送驪歌。宮柳深陰夾道過。去路風烟鄉思切。望
中雲日客愁多。西山翠靄凝金闕。南內青槐蔭玉河。從此
通宵瞻北極。幾回清夢到鳴珂。

晚秋雜興

江關海嶠接天流。玉露商飈萬里愁。九月星河人出塞。一
城砧杵客登樓。荒原返照黃雲暮。絕壁迴風錦樹秋。極望
蒼茫寒色遠。數聲清角滿神州。
太行東出擁神京。古塞秋風右北平。笙鶴已辭滄海使。貂
蟬初撤羽林兵。清霜玉沼芙蓉苑。旭日金鋪翡翠城。魚鱗
時傳宣召急。侍臣通籍在承明。

碧嵩清雒擁干戈。落日愁雲暗渡河。列國幾人存玉馬。五
都今復嘆銅駝。秦師不見條侯下。魏將惟聞晉鄙多。惆悵
夷門雙涕淚。大梁公子欲如何。此詠李自成寇河南
事。結句應指侯朝宗。

送吳巒樾司李桂林

翡翠巢邊匹馬過。干盤桂嶺鬱嵯峨。南浮瀰水啼猿滿。北

望君山。落雁多。蠻府官閒能作賦。漢廷恩近憶鳴珂。愁心
獨繫張平子。欲寄琅玕柰遠何。七子
上乘

潼關

天險東臨鎖地維。重關遙夜角聲悲。蓮花影照干烽出。竹
箭波迴萬馬馳。四塞山河歸漢闕。二陵風雨送秦師。長安
游俠知無數。仗劍還能指義旗。

秋日雜感

金闕珠樓瑞靄中。天門端拱萬方同。鳳城南鎖黃河隘。烏
道西迴紫塞通。三市銅駝愁夜月。五陵石馬泣秋風。玉泉
不識朝宗意。依舊東流入漢宮。此弔都城
失守也

雙闕三山六代看。龍蟠虎踞舊長安。江陵文武牙籤盡。建

業風流玉樹殘。青蓋血飛天日暗。黃旗氣掩斗牛寒。翩翩
入雒羣公在。剩有孤臣淚未乾。此感金陵
之亡也

經年顛顛客吳關。江草江花莫破顏。豈惜餘生終蹈海。獨
憐無力可移山。八廚舊侶誰奔走。三戶遺民自往還。圯上

隆中俱避地。側身懷古一追攀。此公避地時作
其志亦可哀矣

登神山仙館同惠朗勝時作

鼇冠迢遞海天分。緜嶺笙歌徹夜聞。谷口花深三里霧。樓
前鶴下十洲雲。羽人佩冷星河影。玉女香消月露文。丹井
可能穿地底。裁書誰報洞庭君。思致清曠
不傷瑯瑤

重游弇園

放艇春寒島嶼深。弇山花木正蕭森。左徒舊宅猶蘭圃。中

散荒園。尚竹林。十二敦槃誰狎主。三千賓客半知音。風流
搖落無人繼。獨立蒼茫異代心。沈確士云。今弇園一帶廢
為民居矣。讀此不勝時代

雲中邊詞

大同女兒顏如花。十五學得箏琵琶。莫向中宵彈一曲。清
霜明月盡思家。

從軍行

彎弓獨上李陵臺。極望胭脂秋色來。磧路西迴三萬里。青
天遙掛白龍堆。
一望穹廬匝地寬。將軍中夜出皋蘭。月臨青海千烽亂。雪
照黃河萬馬寒。

明三十家詩選初集卷七下

顧炎武

四十四首

錢塘

汪端

允莊輯

炎武初名絳字寧人後更今名號亭林崑山人本生父同應蔭生能文好義從叔同吉未婚天聘王氏哀麻來歸逾一紀寧人始生撫爲嗣子生有異稟觀書十行俱下年十四爲諸生崇禎末入復社有名與同邑歸莊友善皆耿介不渾俗人以歸奇顧怪目之屢試不遇見時多故遂棄去舉業屏居山中取家藏經史累朝實錄及天下郡縣志明代名人文集奏疏徧閱之有得卽錄積數十帙名曰天下郡國利病書福

王立以貢薦授兵部司務未仕嗣母王夫人初以節孝旌表及乙酉南都破不食而卒遺命子無事異代唐王稱號閩中遙授職方司主事亦不及赴尋避訟盡鬻其產寄居章邱別治田舍久而爲土人攘奪又遷山西營書院一區朱彝尊嘗題其柱曰入則孝出則弟守先王之道以待後學誦其詩讀其書友天下之士尙論古人蓋實錄也僑居少暇輒周覽山川考古今治亂之迹證以金石銘碣著作不輟嘗五謁孝陵兩謁天壽山諸陵四謁莊烈攢宮惓惓故國之思終身如一日康熙戊午詔舉博學鴻詞廷臣將薦之馳書堅辭壬戌正月卒於曲沃年七十所著書共

數十種於六書音義尤有獨得撰古音表二卷易音三卷詩本音十卷唐韻正二十卷音論二卷統名音學五書又詩集五卷文集六卷日知錄三十二卷并左傳杜解補正九經誤字石經考金石文字記吳才老韻補正昌平山水記等諸雜著皆門人吳江潘耒梓行其天下郡國利病書一百卷肇域志一百卷及二十一史年表歷代宅京記等書又百餘卷並藏其甥徐乾學家今多散佚

朱錫鬯曰寧人詩事必精當詞必古雅抒山長老所云清景當中天地秋色庶幾似之
沈確士曰亭林韻語其餘事然風霜之氣松栢之質

兩者兼有就詩品論亦不肯作第二流人

汪端論曰亭林學問博大精深自天文輿地以至河渠兵法音韻金石莫不口舉其詞心通其義折衷定論確不可移殆通儒而兼王佐之才設見用於世其建立當不在劉青田下而倦懷故國冥鴻高蹈真可俯視蕭曹平揖園綺矣其詩憑弔滄桑語多激楚茹芝采蕨之志黍離麥秀之悲淵深樸茂直合靖節浣花爲一手豈宋谷音月泉諸人所能伯仲哉

秀州

秀州城下水。日夜生春雲。雲含秀州塢。鳥下吳江濱。我願乘此鳥。一見倉海君。異人不可遇。力士難再得。海內不乏

賢。何以酬六國將。從馬伏波田牧邊。郡北復念少遊言。悲高一悽惻。

古隱士

嘗聞龐德公。自守甘窮餓。旦率妻子耕。不知州牧過。關中催汜攻。河上袁呂破。默默似無聞。但理芸鋤課。獨識諸葛君。一言定王佐。

謁夷齊廟

言登孤竹山。愾焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行辟虐政。甘餓首陽岑。不忍臣二姓。可爲百世師。風操一何勁。悲哉尼父窮。每歷邦君聘。楚狂歌鳳衰。荷蕢譏擊磬。自非爲斯人。棲棲無

乃佞我亦客諸侯。猶須善辭命。終懷耿介心。不踐脂韋徑。
庶幾保平生。可以垂神聽。沈確士云。唐人登首陽山。只淡
淡寫景。此作者自抒懷抱。應以
議論
爲長

天壽山

成祖昔定都。乃省茲山陽。羣山自天來。勢若蛟龍翔。東趾
據盧龍。西脊馳太行。後尻坐黃花。前面臨神京。中有萬年
宅。名曰康家莊。可容百萬人。豁然開明堂。維時將作臣。奉
旨趨傍傍。盛德比霸杜。宏規軼灑邨。雷電驅玄冥。白雲升
帝鄉。三光墜榆木。窮北回輻輳。駮駮金粟堆。寂寞橋山藏。
右獻左次景。裕茂迤西旁。泰陵在茂西。稍折南維康。永陵
在東南。規模特恢張。礪石爲立墀。丹青煥雕梁。昭近九龍

池。定依昭左方。其制亦如永。工麗踰孝長。慶居獻西隅。德
奠永東岡。環山數十里。松柏參天蒼。列宗每駕朝。百執恒
趨蹌。一年祭三舉。侍從來班揚。詩追安世歌。典與郊禘光。
自傷下土臣。不睹昭代章。天禍降中國。滅我聖哲王。渴葬
池水南。靈宮迫如殤。上無寶城制。周而唯甃牆。下有中涓
墳。陪葬義所當。殿上立三主。妃栗帝后桑。問此何代禮。哽
咽不可詳。麥飯提一簞。棗棹提一筐。村酒與山蔬。一一自
攜將。下階拜稽首。出涕雙浪浪。重上諸陵間。裴回復彷徨。
茂陵樹千株。獨立不受戕。門闔尙完具。上頭安御牀。自康
以接慶。小樹多榆枋。殿樓盡黃瓦。透迤各相望。康昭二明
樓。竝遭劫火亡。定陵毀大殿。以及東西廊。餘陵半無門。累

四
壁仍支。宋尚存宰牲亭。暨外諸監房。石人十有二袍。笏兼
戎裝六獸柱。則四制與鍾山亢跨。以七孔橋峙。以白石坊
仁宗所製碑。皆崇當中央行宮。已頽壞。御路徒荒涼。每陵
二太監猶自稱司香人。給地數畝。把耒耕山場。春秋祭碑
下。共用一豕。羊皆云牧騎來斫伐。尤披猖。并力與之爭。僅
得保界疆。有盜貴妃冢。斬首竿以槍。於時姦宄民瞿然。始
懲創。繞陵凡六口。六口各有兵。一陵立一衛。衛設屯與倉。
居庸有總兵。昌平有侍郎。一朝盡散。逆無復。陵京防。燕山
白峩峩。沙河自湯湯。皇天自高高。后土自芒芒。哭帝帝不
聞。顛天天靡常。誰充八陵使。陳辭申此章。澄懷云煌煌鉅
如長江大河不可以斗石計少陵北
征後此其嗣音當為明代五古第一

秋雨

生無一錐土。常有四海心。流轉三四年。不得歸園林。蹠地
每塗淖。闕天久曠陰。尚冀異州賢。山川恣搽尋。秋雨合淮
泗。一望無高深。眼中隔泰山。斧柯未能任。車沒斷崖底。路
轉崇岡岑。客子何所之。停驂且長吟。夸父念西渴。精衛憐
東沈。何以解吾懷。嗣宗有遺音。起二句卽杜
陵希稷契意

王官谷

士有負盛名。卒以虧大節。咎在見事遲。不能自引決。所以
貴知幾。介石稱貞潔。唐至昭宗時。干戈滿天闕。賢人雖發
憤。無計匡机陞。邈矣司空君。保身類明哲。墜笏維陽墀。歸
來臥積雪。視彼六臣流。耻與冠裳列。遺像在山厓。清風動

巖穴堂茆一畝深。壁樹千尋絕不復見斯人。有懷徒鬱切。
起四語虞山合肥輩讀之能無汗下

述古

微言既以絕。一變為從橫。下以游俠權。上以刑名衡。六國固蚩蚩。漢興亦攘攘。不有董夫子。大道何由明。孝武尊六經。其功冠百王。節義生人材。流風被東京。世儒昧治本。一槩而相量。於乎三代還。此人安可忘。

六經之所傳。訓詁為之祖。仲尼貴多聞。漢人猶近古。禮器與聲容。習之疑可睹。大哉鄭康成。探蹟靡不舉。六藝既該通。百家亦兼取。至今三禮存。其學非小補。後代尚清談。士苴斥鄒魯。哆口論性道。捫籥同矇瞽。
沈確士云清言何足論宋人掃斥筌疏亦

偏見也篇中議論豈云小補

五國竝時亡。世道當一變。掃地而更新。三王功可見。鼓琴歌有虞。釣者知其善。區區山澤間。道足開南面。天步未回旋。九州待龍戰。空有濟世心。生不逢堯禪。何必會風雲。弟子皆英彥。俗史不知人。寥落儒林傳。
自註文中子書五國並時而亡蓋傷先王之道盡墜故君子大其言極其敗於是乎掃地而求更新也。沈確士云後賢以隋史無王通傳疑為烏有先生果爾古人之可疑者多矣此詩可為正論

邢州

太行從西來。勢如常山蛇。邢洛在其間。控壓連九河。唐人守昭義。桀驚不敢過。憑此制山東。腹心實非他。事已邈悲風。芒然吹黃沙。乞食向野人。從之問桑麻。

廣昌道中

匹馬去燕南。易京大如礪。五迴春雪深。淒上孤城閉。行行入飛狐。夕駕靡遑稅。融冰見睨流。老樹陵寒霽。啄鵲馴不驚。臥犬安無吠。問客何乃來。幽都近如沸。出車日麟麟。戈矛接江裔。此地幸無兵。山田隨樹藝。且偷須臾閒。未敢謀卒歲。

久客燕代間。遂與關山老。流連王霸亭。躑躅劉琨道。枯萸春至遲。落木秋來早。獨往茲愴然。同遊昔誰好。三楚正干戈。沅湘彌浩浩。世乏劉荆州。託身焉所保。縱有登樓篇。何能盪懷抱。思因塞北風。一寄南飛鳥。作者五古英挺卓犖氣體特高

過矩亭拜李先生墓下

人生無賢愚。大節本所共。蹉跎一失身。豈不負弦誦卓哉。李先生九流稱博綜。心鄙馬季長。不作西第頌。屏居向郊坰。食淡常履空。清修比范丹。聰記如應奉。力學不求聞。終焉老家術。同時程中丞。一疏亦驚眾。玉璽安足陳。亟進名臣用。黨論正紛拏。中朝竝罷訟。世推山東豪。三李尤放縱。祠奄與哭典。後先相伯仲。初踰士類閑。竟折邦家棟。悲哉五十年。風塵尚頽洞。我來拜遺阡。增此儒林重。雖無警咳接。猶有風流送。自非隨武賢。九原誰與從。自註程中丞名巡撫河南時漳河傍得璽上疏秦璽不足貴國家以賢為寶薦黨籍諸臣十餘人不納遂謝病歸

歲暮

平生慕古人。立志固難滿。自覺分寸長。用之終已短。良友

日零落。悽悽獨無伴。流離三十年。苟且圖飽煖。壯歲尙無聞。及今益樗散。治蜀想武侯。匡周歎微管。願一整頽風俗。人謂迂緩。孤燈照遺經。雪深坐空館。澄懷云作者用世之志具見此篇

介子推祠

古人有至心。不在狷與忍。國祿既弗加。吾身可以隱。去矣適其時。耕此荒山畛。更與賢母偕。邱壑情同允。卓哉驚鳳姿。飄飄高自引。嚮使屬戎行。豈其遜枝軫。出處何必齊。此心期各盡。末世多浮談。有類激小忿。割股固荒唐。焚山事可哂。微哉仲子廉。立操同蚯蚓。遺祠君故鄉。父老事惟謹。牡丹異凡花。春深洗鉛粉。況此黃蘆林。晚送秋風緊。厲彼頑鈍徒。英名代無隕。持論明確真不破古人瞞過

懷人

秋風下南國。江上來飛鷺。江頭估客幾千輩。其中別有東吳船。吳兒解作吳中曲。扣舷一唱悲歌續。乍迴別鶴下重雲。一叫哀猿墜深木。曲中山水不分明。似是衡山與洞庭。日出長風送舟去。祇留江樹青冥冥。湘江削立天之角。五嶺盤紆同一握。嶽峯七十有二峰。紫蓋獨不朝。衡嶽萬里江。天木葉稀行人相見各沾衣。寄言此日南征雁。一到春來早北歸。哀絲急管託興深微

桃葉歌

桃葉歌。歌宛轉。舊日秦淮水清淺。此曲之興自早晚。青溪橋邊日欲斜。白土岡下驅虞車。越州女子顏如花。中官采

取來天家可憐馬上彈琵琶。三月桃花四月葉已報北兵屯六合。宮車塞上行塞馬江東獵桃葉復桃根殘英委白門相逢冶城下猶有六朝魂。音節淒怨

寄問傅處士土堂山中

向平嘗讀易亦復愛名山。早跨青牛出昏騎白鹿還太行之西一遺老。楚國兩龔秦四皓春來洞口見桃花儻許相隨拾芝草。

訓王處士九日見懷之作

是日驚秋老相望各一涯。離懷銷濁酒愁眼見黃花。天地存肝膽江山閱鬢華。多蒙千里訊逐客已無家。

一雁

一雁度汾河河邊積雪多。水枯清澗曲風落介山阿。塞上愁書信人間畏網羅。覆車方有粟飲啄意如何。

龍門

巨地黃河出開天此一門。千秋憑大禹萬里下崑崙。入廟煮蒿接臨流想像存無人書壁問倚馬日將昏。大家手筆

嵩山

位宅中央正高疑上界鄰石開會出啟嶽降再生申老柏搖新翠幽花茁晚春。豈知巢許窟多有濟時人。有壁立萬仞之槩一

結尤警言絕

贈朱監紀四輔

十載江南事已非與君辛苦各生歸。愁看京口三軍潰痛

說揚州七日圍碧血未銷今戰壘白頭相見舊征衣東京
朱祐年猶少莫向尊前歎式微

郝將軍太極滇人也天啟中守霑益余於敘功疏識
其姓名今爲醫客於吳之上津橋言及舊事感而有

贈

會提一旅制黔中水蘭諸酋指顧空入楚廉頗猶未老過
秦扁鵲更能工風高劔氣蛉川外水沸茶聲鶴澗東橋畔
相逢不相識漫將方技試英雄使事工切

有感

長看白日下蕪城又見孤槎海上橫感慨河山追失計艱
難戎馬發深情崩車斷簇周千畝蔓草枯楊漢二京今日

大梁非舊國夷門愁殺老侯嬴

訓陳生芳績

百里相思路阻紆每承遺札訊何如絕交已廣朱生論發
憤終成太史書笠澤水清蓮底日虞山葉落到根初從今
世事無煩問但掩衡門學種蔬

秋柳

昔日金枝間白花只今搖落向天涯條空不繫長征馬葉
少難藏覓宿鴉老去桓公重出塞罷官陶令乍歸家先皇
玉座靈和殿淚灑西風夕照斜沈確士云小題俱有
關係此杜陵詠物體

訓徐處士元善昔年新城之陷其母死焉故有此作
桓臺風木正蕭辰傾蓋知心誼獨親季子已無觀樂地偉

元終是泣。詩人愁看落日。燕山夜畏見荒江。郢樹春踏徧。
天涯更回轡。欲從吾友卜東鄰。

三屯營

三屯山勢鬱崢嶸。少保當年此建旌。名似北平臨宿將。制
如河上築降城。忠祠日落來山鬼。武庫苔封蝕禁兵。一望
幽燕人物盡。頽垣荒草不勝情。

劉諫議祠

皁囊青史漫傳名。白日黃泉氣未平。自古國亡緣宦者。可
憐身沒尚書生。荒阡草長妖狐出。舊驛風寒倦馬行。自
德陵升馭後。山河祠廟總淪傾。

居庸關

極目危巒望八荒。浮雲夕照徧山黃。全收朔地當年大。不
斷秦城自古長。北狩千官隨土木。西來羣盜失金湯。空山
向晚城先閉。寥落居人畏虎狼。五六如
椽之筆

與江南諸子別

絕塞飄零苦著書。竭來行李問何如。雲生岱北天多雨。水
決淮壩地上魚。濁酒不忘千載上。荒雞猶唱二更餘。諸公
莫效王尼歎。隨處容身足草廬。蒼莽
悲涼

送王文學麗正歸新安

兩年相遇都門道。只有王生是故人。原廟松楸頻眺望。夾
城花萼屢經巡。悲歌絕塞將歸客。學劍空山未老身。貰得
一杯燕市酒。傾來和淚溼車輪。

訓傳處士次韻

清切頻吹越石笳。窮愁猶駕阮生車。時當漢臘遺臣祭。義激韓讐舊相家。陵闕生哀回夕照。河山垂淚發春花。相將便是天涯足。用虛乘犯斗槎。氣韻沉雄。

亡友

潘工之弟未遠來受學兼有投詩答之

十年離別未言還。楚水楓林極望間。野雀暮歸吳季廟。寒濤秋擁伍胥山。人琴已逝增哀涕。笠屨相看失壯顏。獨有士龍年最少。一朝詞筆動江關。按未即稼堂太史也。其兄力田與亭林交。

讀李處士雍襄城紀事有贈

處士之父可從崇禎十五年。以壯士隸督師汪公。喬年麾下以五千人。勦賊至襄城死之。處士年十

六貧甚與其母彭氏并日而食。力學有聞。越二十九年始得走襄城為汪公及其父設祭招魂以歸。余與處士交為之作詩。

躑躅荒郊醉一樽。白楊青火近黃昏。終天不返收嶠骨。異代仍招復楚魂。湛阪愁雲隨獨雁。潁橋哀水助啼猿。五干國士皆忠魄。孰似南山孝子門。

路光祿書來言江東同好諸友一時徂謝感歎成篇。削迹行吟久不歸。修門舊館露先晞。中年早已傷哀樂。死日方能定是非。彩筆夏枯湘水竹。清風春盡首山薇。斯文萬古將誰屬。共爾衰遲老布衣。沉痛入骨。

高漸離擊筑

神州移水德。故鼎去山東。斷霓夫人劍。殘煙郭隗宮。身留
烈士後。跡混市兒中。改服心彌苦。知音耳自通。沈淪餘技
藝。慷慨本英雄。壯節悲遲晚。羈魂迫固窮。一吟遼海怨。再
奏薊邱風。不復荆卿和。哀哉六國空。

祖豫州聞雞

萬國秋聲靜。三河夜色寒。星臨沙樹白。月下戍樓殘。擊柝
行初轉。提戈夢未安。沈幾通物表。高響入雲端。豈足占時
運。要須振羽翰。風塵懷撫劍。天地一征鞍。失旦何年補。先
鳴意獨難。函關猶未出。千里路漫漫。二詩悲憤如
聞變徵之聲

禹陵

大禹巡南守。相傳此地崩。禮同虞帝陟。神契鼎湖升。窆石

形模古。墟宮世代仍。探奇疑是穴。考典或言陵。玉帛千年
會。山河一氣憑。御香來敕使。主守付髡僧。樹暗巖雲積。苔
深壑雨蒸。鶴鷗呼冢柏。蝙蝠下祠燈。餘烈猶於越。分封並
杞鄩。國詒明德昨。人有霸圖稱。往者三光墜。江干一障乘。
投戈降北固。授子守西興。冲主常虛已。謀臣動自矜。普天
皆爵祿。無地使賢能。合戰山回霧。窮追海踐冰。蠡城迷白
草。鏡沼爛紅菱。樵採岡陵徧。弓刀塢壁增。遺文畱仆碣。仄
徑長荒藤。望古頻搔首。嗟今更撫膺。會稽山色好。悽惻獨
攀登。

井陘

水折通燕海。山盤上趙陘。權謀存史冊。險絕著圖經。瞰下

如臨井。憑高似建瓴。壑冰當路白。窯火出林青。頗憶三分國。曾觀九地形。秦師踰上黨。齊卒戍熒庭。獨此艱方軌。於今尙固扃。連恒開晉索。指昴逼虞星。乞水投孤戍。炊藜舍短亭。却愁時不會。天地一流萍。

華山

四序乘金氣。三峰壓大河。巨靈雄鼻屨。白帝儼巍峩。地劣窺天井。雲深拜斗阿。夕嵐開翠巘。初月上青柯。欲摘星辰墮。還虞虎豹訶。正官朝殿闔。持杖叱羲和。勢扼雙嶠壯。功從駟伐多。未歸桃塞馬。終負魯陽戈。山鬼知秦帝。蠻王屬趙佗。出關收楚魏。浮水下江沱。老尚思三輔。愁仍續九歌。唯應王景略。歲晚一來過。明代詩人工五言長律者絕少。惟作者宏厚古勁如金鐘大鑪。

神似少陵脫去排比鋪張之跡。視此益知空同真杜之興隸矣。

落日

落日江津送伍員。秋風壠上別徐君。偶來圯下逢黃石。便去山中臥白雲。想見俠士逸民身分。

和王山史寄來燕中對菊詩

雪滿河橋歸轡遲。十行書札寄相思。楚臣終是餐英客。愁見燕臺落葉時。

附錄

韓洽十三首

洽字君望長洲人。明末隱居陽山。有寄庵詩存。

朱錫鬯曰。崇禎之際。言詩於吳下。吾必以君望為巨。

擘焉匪特高節軼羣也所著篆學測解釋訓考源足
證說文長箋之誤

汪端論曰吳人詩多澹雅君望獨沉厚磊落不屑一
語因人惜時方宗尚竟陵其詩遂鮮有激賞者遺集
失傳所存無幾白香山詩云沉沉海底生珊瑚歷歷
天上種白榆千古同病可勝歎哉

躡帆行

舟之有帆檣本爲順風設逆風亦張帆湖船技獨絕逆來
以順用其妙在曲折峭帆必斜張左右隨所拙旋轉分寸
間向背遂迥別風來雖當頭我舟顧斜掣轉側以背承風
過自後撇帆勢從風歛船舷半沒滅所恃旁版垂故不至

橫截斜行既良久轉躡柁旋振其塗稍紆迴其勢已飄瞥
小水難迂行拘于勢狹劣大海太渺茫回旋恐無節惟湖
既開廣諸山復眉列是法獨可行雖險無晚艤我來包山
游其事始親閱巨舟數播蕩狂濤湧如雪同行未習見驚
惴膽欲裂我心自恬然壯觀殊可悅古來處橫逆濟險賴
明哲遜順無力爭所志終必徹屈曲委蛇間大巧固若拙

題奇
詩奇

言懷

農工與商賈是名曰四民四者雖異業皆以資其身未有
身不謀而可以治人奈何今世士所飾空衣巾沾沾弄文
墨垂涎要路津問之經世略棄置若浮塵達則誤天下窮

則老且貧。身世兩相誤。風俗何由淳。法久乃滋弊。末師焉可循。

二詩識力絕人非兼文章經濟者不能道

古之兵皆農。農富兵亦強。古之士皆農。農樸士亦良。兵農一以分。家室無餘糧。士農一以分。耒耜無文章。待哺難為兵。忍饑難為士。分之則三傷。合之則一理。請告當塗人。治亂實在此。

澄懷曰此章及清溪作或國朝劉繼莊詩誤

訂友人春遊縹緲峰

我思在何許。縹緲湖中峰。穿雲陟其巔。浩蕩開心胸。幽壑出地底。澗松偃虬龍。嘗聞獨往客。每與靈仙逢。徐生家莫釐。隔水問僧鐘。兩峰近相望。一葦能過從。願言叩草堂。遂躡幽人蹤。相將訪靈異。布鞵隨孤筇。山路梅花開。煙嵐晚

逾澗扁舟儻乘興與湖水春溶溶

清溪

白石何粼粼。清流亦混混。輕舟渡前溪。兩岸饒萑葦。落日秋風生。停橈弔山鬼。

龍母祠歌

龍雖靈。鱗甲之物。非人形。何為人母。產龍子。或言子產母。卽死。或云龍太母尚存。敝衣丐食。行荒邨。鄉人惡之。父母擯。龍子思親來省覲。龍入母懷。母乃驚。母翻。因此喪厥生。豈非人龍本。殊類母亦不能通。子意子愛母。兮母不知母。既逝兮子乃悲。龍一怒。忽然平地為深池。役風霆。走蛟螭。築高墳。葬母尸。或言母非死。從龍赴淵水。貝闕珠宮奉母

居龍子。龍孫盡歡喜。神奇恍惚不可推。惟見羊山塢裏巍。
然祠祠前一古柏。滑澤無皺皮。龍來目如炬。蜿蜒柏上如
藤垂。前此數十年。父老猶見之。世間萬事無不有。所以史
策傳信兼傳疑。但願神龍有神禱。輒應五風十雨無愆期。
高原下隰多稼穡。受龍之施報龍德。子母千年長血食。筆力
亦如神龍行空奇矯無匹

李龍眠諸夷職貢圖

有唐貞觀萬國寧。殊方異域皆來庭。立本爲圖擬王會。詭
形怪狀流丹青。龍眠居士生有宋。未必諸蕃眞入貢。得毋
舊本重臨摹。左食貫胸聊玩弄。元豐天子承平日。君臣競
講強兵術。不知中國正凋殘。馳想海邦兼日出。貢糒西旅

四夷賓作訓猶煩保傅臣爲問伯時圖職貢何如鄭俠繪
流民議論正大

雪下紅

籬落徧積素。愈知顏色丹。故非嘉卉列。聊作野花看。天地
存微物。韶華惜歲闌。芳心良獨苦。誰謂不知寒。

鐵馬

急響中宵發。凌空鐵騎行。不知風信至。頓使旅魂驚。當世
正多事。吾儕方苦兵。那堪簷宇下。又作戰場聲。沈確士云
推開感慨時事詠物詩中別有天地

黃孝子端木萬里尋親

父子分殊域。趨庭道路難。一身衝虎豹。萬死涉風湍。乍識

容顏在翻悲涕淚乾故園今共返猶作夢中看

張良樵

一擊或幸中扶蘇作天子劉項雖亡秦未必速如此快如并剪

塞下曲

曉角數聲哀邊風捲地來十年征戍客不上望鄉臺沈確士云

翻進一層倍覺沉痛

聞雁

朔風吹雁渡江千月白霜清響尚寒孤客幾回愁裏聽故鄉何處報平安

沈欽圻 九首

欽圻字得輿長洲人明末諸生入國朝不仕乾隆

中以孫德潛貴贈禮部侍郎有集

沈確士曰 國初詩沿明季餘習多宗景陵先大父

往復陶杜自攄胸臆未嘗求工而自中繩削陸起頑

太僕謂鍾譚之風流毒天下不能濡染沈生大是豪

傑之士太僕先大父師也不輕許人當時以為篤論

汪端論曰得輿感時諸作聲淚俱下足以追蹤杜陵

生祠

虎邱七里塘生祠何纍纍榱棟高入雲丹雘紛陸離連牆與接牖屹然豎豐碑下承以鼉屨上蟠以龍螭華文表德行大論抒猷為某公居官日曲折行其私析利如秋秧忘卻民膏脂文中頌清節飲水邁伯夷某公居官日斷獄無

矜疑五刑任喜怒。罔恤童與耆。文中頌仁愛。臯陶為士師。周覽諛悅文。一例慙惡辭。舊有遺愛人。行政介且慈。行如打包僧。蕭然去官時。士民走相送。各各涕漣洏。誰為建祠宇。惟畱後人思。好官無生祠。墨吏有生祠。好官與墨吏。行人知不知。沈確士云。傾吐出之。如白傅秦中吟。辭氣風骨無一不肖。

贈徐元歎

少年為俠客。萬金散盡不少惜。中歲為詩人。遠之楚澤哀靈均。歸來慕隱者。脫棄浮榮如土苴。晚歲依空門。庵名落木歸本根。我來訪君荒山裏。畱客晚餐烹菊杞。夜寒襆被擁繩牀。月滿空庭疑積水。不是尋常話。箭鋒生平披豁見。心胸卅年無限悲涼事。付與晨鐘暮鼓中。沈確士云。贈詩竟作元歎小傳。

起手人語立格甚奇。一結蘊含可思。

哭劉剩庵先生 名永錫

萬里離家客。孤身易簣時。變名惟恐識。後死尚嫌遲。麥飯隣僧薦。蓬廬野父悲。招魂弟子事。愧乏楚人辭。

書事

天地兵戈滿。江湖逋竄頻。白頭難許國。淚眼不逢春。玉闕悲龍馭。雄關喪虎臣。唐家靈武業。望斷素衣人。沈確士云。社稷後有望於南都。擁立也。江邊老人淚暗。泣眼昏不見風塵。清憂時感事古今一轍。

詠史

臥薪嘗膽日。縱飲擘箋時。但識憑江險。而忘厝火危。一堂爭洛蜀。四鎮角熊羆。此日王夷甫。清言或未宜。

君臣魚水合半壁且游嬉樂奏李天下歌傳郭順時還須
求故劍慎勿剪連枝野老瞻烏意茫然空爾思沈確士云此南都事
勢也不止於從臣皆半醉天子自無愁矣須求故劍勿剪連枝當時草野自存公論

亂後哭友

故友如黃葉傷心漸覺稀途窮天地窄世亂死生微腹痛
車頻過琴亡人已非嗟余稱後死慟哭返荆扉

梅

冰霜磨鍊後忽放幾枝新獨立江山暮能開天地春自然
空色相誰與鬪精神野客閑相對如逢世外人尊梅之品前無古人

送楊日補南還

去年春盡同為客此日君歸又暮春最是客中偏送遠況

堪更送故鄉人沈確士云四層曲折一氣傳寫略不雕琢是唐人絕句品格

邢昉十二首

昉字孟貞高淳人崇禎時諸生以隱終有集

施尚白曰孟貞詩以陶汰為工以沖淡為則以婉惻
悲涼為主其企而峻之潔也若病暍者之思清冷其
厭穠縟而引避也若見羸豕之負泥塗而紈綺之蒙
糞土也故其詩清越無纖埃人病之為郊寒島瘦不
惜也

王貽上曰余嘗與李退庵論近日布衣詩余舉程孟
陽吳非熊退庵曰終須還他邢昉第一又曰余最許
石湖邢孟貞五言詩以為韋柳門庭中人惜未及友

其人官祭酒時鄉人李君令高瀆特屬訪其子孫李
至訪之則老妻稚孫煢煢孤寡饘粥不繼李脫贈三
百金為置腴田其家竟不知出余意也

汪端論曰孟貞諸體皆工七律尤淒婉可誦神韻似
韋端已吳子華而氣格過之

憶幼子

汝生初墮地我游五茸城三月始入門聞汝呱呱聲從此
更遠游越嶠東南征三為象浦客六傍惡溪行在遠日何
多在家日何少屈指幾度別垂髫忽已好三歲別我時門
前牽我衣宛轉學人語問我幾時歸四歲及五歲別我涕
能揮七歲差解事鞠躬步庭幃去冬復別我含悽叩所如

本言渡江去卻寄金陵書今汝年九齡毛詩誦曹鄴前日

有書來頗與人意會世亂我已老我衰汝始大如何久契

澗喟然發長嘅朱笠亭云敘出游蹤跡別離

感懷

幼安昔避地茫茫涉廣川踰海不謂遠一去四十年往往
談名理亶亶造深元問所與談誰乃是公孫淵口罔論世
事聊此相周旋龍德既無損清風久逾宣生世偶相符其
當師此賢孟貞自道人品

溪行屢經與亡友胡印度別處

濺濺溪水側是子門前路涓流亂石間褰裳乃可渡憶昔
造子廬欸欸平生故樽醪亦時有日晏未遑去相送屋東

明三
偏幽林每徐步。欹岸注微波。殘陽在高樹。情因老。易悲欲別。恒返顧。茲來溪草綠。偶到臨分處。余猶耿夙歡。子已長不寤。流泣但徘徊。空慚子桑扈。寫情沉摯自足動人

黃州寄杜于皇

葦岸風淒日漸微。長堤繫艇晚依依。十年紅樹辭鄉去。八月黃州見雁飛。燒罷林廬殘址在。戰餘茅屋幾家歸。翻憐此夕君思我。揚子潮回木葉稀。

漢江懷古

會共方城振楚關。英雄消盡逝波間。微霜欲下漢陽樹。落日初銜大別山。蘭杜秋來洲尚綠。蕭湘南去竹多斑。燒燈雀懸題詩處。一眺風塵倍慘顏。

九日大別山登高

鸚鵡洲邊草盡黃。白沙如雪禹祠荒。古來哀怨多歸楚。此日煙波正望鄉。山翠乍連杯酒色。亂離頻過幾重陽。眼前不見茱萸紫。起傍峰頭數雁行。

得伯璣蕪湖書却寄

相逢世難成。羈旅庾信平生賦。可哀白下窮。交幾人在南州。孺子一書來。春風草色楊花落。門巷鳩茲燕子回。衰鬢不堪頻極目。汀洲無限水滌洞。

清明前三日雨坐與九齋中

十日狂風吹散絲。林廬清寂起遙思。閑園隔歲人來少。小閣當花鳥下遲。新塚哭殘芳草路。長堤眠盡綠楊枝。明朝

雨止高原上。步步含愁見我癡。

雲間九日登興聖寺塔

蕭森萬木總荒涼。幾處登高黯自傷。海上數峰平入檻。天涯九日遠思鄉。雲山雁鴛家千里。歲月音書淚數行。南國秋風搖落後。不堪游子怨河梁。

答吳見末廣陵見寄

不獨嗟君事遠征。蒹葭我亦重含情。家林別後楓俱老。戰地歸來草盡生。黍薄渚田秋水在。雁過霜樹瀨雲橫。遙知此度揚州興。水部梅花月又明。

夜雨同王雨若宿雞鳴寺賦別

寺外嵐煙積水濱。攀林踏閣倚青旻。一朝風雨辭鄉國。幾

日江臯別故人。歲晚寄書常泛梗。夜闌秉燭更沾巾。吳淞八月寒如鏡。不見王家塵尾塵。

重陽前一日同龍友阻風宏濟寺因過僧舍縱觀奇石分韻

懸巖面面倚嵯峨。絕壁蒼蒼挂女蘿。散盡白雲尋古寺。吹殘黃葉滿寒波。秋風又到重陽節。江夜其如一雁何。無數帆檣更西去。中流日夜起鼉鼉。

八代... 不見... 王... 試... 重... 一日... 同... 詩... 文... 風... 志... 聖... 賢... 之... 學... 以... 興... 起... 絕... 學... 為... 己... 任... 其... 持... 論... 謂... 孔... 子... 以... 後... 有... 真... 儒... 周... 公... 以... 下... 無... 善... 治... 其... 學... 以... 居... 敬... 窮... 理... 為... 本... 推... 極... 於... 體... 國... 經... 野... 凡... 天... 官... 地... 理... 禮... 樂... 河... 渠... 以... 至... 用... 兵... 行... 陣... 之... 法... 口... 區... 手... 畫... 燦... 若... 列... 眉... 窮... 居... 授... 徒... 隱... 然... 負... 開... 濟... 之... 重... 鼎... 革... 後... 絕... 意... 進... 取... 與... 陳... 瑚... 江... 士... 韶... 盛... 敬... 遜... 跡... 荒... 村... 被... 褐... 談... 道... 人... 稱... 婁... 東... 四... 先... 生... 自... 號... 桴... 亭... 其... 讀... 書... 處... 也... 順... 治... 間... 督... 學... 張... 能... 麟... 具... 禮... 聘... 委... 輯... 儒... 宗... 理... 要... 丙... 午... 以... 後... 講... 學... 於...

明三十家詩選初集卷八上

錢塘 汪 端 允莊輯

陸世儀 六十四首

世儀字道威太倉人明末諸生弱冠志聖賢之學以興起絕學為己任其持論謂孔子以後有真儒周公以下無善治其學以居敬窮理為本推極於體國經野凡天官地理禮樂河渠以至用兵行陣之法口區手畫燦若列眉窮居授徒隱然負開濟之重鼎革後絕意進取與陳瑚江士韶盛敬遜跡荒村被褐談道人稱婁東四先生自號桴亭其讀書處也順治間督學張能麟具禮聘委輯儒宗理要丙午以後講學於

錫山東林書院說易於毘陵大儒祠設教於雲陽黃塘聞風親炙者皆感動奮發辛亥巡撫馬祐延爲館師間諮以江南利病先生備陳本末在署四十日病亟還里卒年六十一門人私謚尊道先生亦曰文潛先生所著有桴亭詩文集十卷又自紀所得爲思辨錄瑚士韶及先生門人毛師柱許焜摘其精義分類編輯名輯要凡三十卷又有四書問答禮衡易窺先儒語錄集成明儒語錄集成格致編論學酬答水利區田書宗祭禮書鑑詩鑑讀史筆記治通治鄉三約甲申臆議八陣發明城守要畧梅花槍譜等書

陳言夏日桴亭少時古風取裁漢魏近體得法李唐不屑爲卑弱不振之調西戊以後憂愁幽思殆近離騷晚年益造自然長篇短幅縱筆所之無不如意總之桴亭論詩以三百篇爲主故一字一句必有合於興觀羣怨之旨非若世之爲詩者以剽竊詞華擬議聲病爲能也

周淑文曰陸子於天人之學罔不該貫詩特其緒餘耳蓋瀾生於海滔漭萬狀終莫測其所來陸子之學海猶是也分其一波一勺而皆有全海之味安得而測哉不求工而自工不必拙而亦無妨於拙總之不在篇章字句間可以畢其性情所至也

馬肇易曰桴亭先生著述甚富而微言奧義之炳著於思辨錄一書有無遠不屆之聰明無微不至之學力又存之極其正推之盡其大直接危微精一之心傳宏開起弊扶衰之道統其天人性命之際不過諸儒所已言至於純粹透徹使智愚皆暢然各得者非諸儒之所能言也其井田封建等制初非大儒所不能言至於畫一變通使古今皆可確見施行者即大儒鮮有能言之者矣

婁東詩派曰桴亭詩弼中彪外醇而後肆夫唯大雅卓爾不羣不虛矣

汪端論曰桴亭先生備體用之兼才嗣程朱之絕學

其詩氣雄而不使氣才大而不矜才高古則孔檜秦松純粹則渾金璞玉昔孫器之評杜詩如周公禮樂後世莫能擬議明代詩人當之無愧者其唯先生乎○亭林以悲壯勝桴亭以渾厚勝在明季逸民詩中最高爲巨擘如登岱華之巔一覽衆山小矣余故采韓君望諸家詩以次附焉

空潭三章章四句

空潭志潔也時賢有以黨附相援托之以見志焉

空潭漉漉水深魚伏維綸則直維鈎則曲

空潭漪漪水深魚肥奇直是慕曲或致之

空潭瀄瀄水深魚逝曲不可致直亦難繫

三百篇之遺

梳頭吟

舉首理青絲。低首深所思。不願青絲常如此。但願白首對
君子。脫口而出

哀黃雀

哀黃雀。黃雀飛且鳴。飛鳴一何急。苦饑不得食。荒田草離
離。糝穀無糠粃。汝不聞東家之子。千金軀。朝來自分埋溝
渠。那有餘穀活汝為。

新蒲綠

新蒲綠。新蒲綠。韶華滿眼紛成觸。傷心又是十年餘。轉盼
滄桑幾翻覆。燕子飛飛高下逐。唧泥依舊巢華屋。杜鵑何
處不歸來。月上三更啼未足。

新蒲綠。新蒲綠。嫩柳天桃門妍靨。獨有萋萋芳草痕。天涯
望斷王孫目。秦宮漢苑遊麋鹿。楚水吳山栽苜蓿。日落蒼
梧帝子愁。紛紜淚滿瀟湘竹。二詩血淚疑淚而成。讀者亦為凄斷。

甌山士

越甌底山有鄉塾師亡其姓氏丙戌之役與鄉人
約曰吾不復食矣當活埋我若等為備兩缸覆之
鄉人給曰諾越日索缸鄉人遂置之猶以為戲也
先生于山陽命開壙置缸端坐令封好鄉人果覆
之又越日鄉人呼曰先生先生曰諾鄉人曰為先
生開之先生曰入不復出矣連呼五日皆應至六
日遂絕聲越人稱之曰甌底山高士雲門梵林述

其事係之以詩并來索和爲作甌山士
甌山士。甌山士。甌底山頭授書史。人生何用讀五車。但須
一識忠孝旨。輶車北來飲江水。金鳧銀雁飛都市。越國風
塵高蔽天。兩缸覆我甌山前。上有碧落下黃泉。冥冥長夜
年復年。普天絕無乾淨地。甌山猶存土一簣。

越舟女

越舟女亦雲門梵林所述丙戌錢塘不守越城騰
沸婦舟競出舟塞港不得前遇騎將掠之婦女皆
相持入水至聯舟俱空

越舟女。越舟女。盡是深閨洞房侶。一朝鐵騎過錢塘。撇掬
聯舟赴江渚。君不見臨安城中春睡濃。日高粧鏡猶塵封。

蘇公堤頭二三月。畫船歌舞來春風。遊人近前面發紅。相
將竟入馮夷宮。越舟女。越舟女。節義芳名吾與汝。誰向王
家秉國成。忍使江潭葬羅綺。君不見古公之郊無怨女。

雙白鷺

濡須沈氏女。琇娘嫁陸氏。陸有女名蟾姑。甚相得。
壬午流寇陷濡須。陸氏舉家竄。琇娘與蟾姑以巾
連屬。手臂相率投。智井每至昏暮。有二白鷺飛翔
井上。人以其爲二女之精靈云。

雙白鷺。雙白鷺。智井飛翔向昏暮。行人借問誰氏井。云是
蟾姑。琇娘墓。小姑弱嫂兩相依。日夕追隨綺閣西。狂飈忽
起珠玉碎。須臾盡作井中泥。井中泥。一何潔。香比幽蘭白。

比雪家家雞逐野鷺誰能相從白鷺宿樂府諸詩激揚忠烈凜凜有生

氣音節亦樸健無匹詩如此方不徒作

割股吟有序

古來忠臣孝子之心非絲竹不能表其志拘憂履霜諸吟操所由作也大興曹孝子廣攄割股救母而死其心始終不欲以告人予聞而悲之為作割

股吟以見孝子之心

猗嗟男兒兮維母之身以母救母兮違惜其生母生兒生兮上天之仁母生兒死兮是見之心母能長生兮見即存澄懷云寫出孝子心

存澄懷云寫出孝子心

白玉澗哀死忠也

白玉澗邊澗水白中有流丹化成碧夜寒月照長虹生直上千天天欲坼人年八十號眉壽猶作忠魂詈強寇攀棺孝子死方烈孫又繼之感決脰一門三烈世已希更有義僕尤稱奇生事盡力死盡禮心堅化石人嗟咨人嗟咨鬼悽惻後來誰人當史職作史慎勿遺幽忠幽忠或遺天所殛世上人心盡如此世間安得有改革

秋夜詞

良月滿高臺鳴琴發情愔月華墮清寒散作琴上露何當成淚珠彈向天涯暮鳳凰自相求莫在臨邛任圓秀如珠溫純如玉

感懷

登山孰最高孟門與太行處世孰最難要津與名場羶集

衆所附。利在國乃狂。是以古賢人。千乘如糶糠。紛紛壅斷
子胡爲日皇皇。蟻蛄轉糞丸。鳳凰慕高岡。志尙各有適。誰
復辨穢芳。慨當以慷

雨後晚步

我方出門行。飛鳥已倦還。行止雖不同。各自娛其天。昨夜
雨初足。田疇媚娟娟。牧子抱犢臥。今日聊息肩。此詩卻似陶公

病中偶吟

天地迴無極。我生殊有涯。難將一寸地。種盡人間花。春氣
一以滋。萬物皆萌芽。大哉陽和功。博達非浮夸。澄懷云何等抱負

東海宋子猶奉親。避兵移居婁中。作移居詩見示。爲

賦二首以贈

瓊風翻地軸。海水亦震蕩。志士惜儉紀。邁身獨孤往。六年
棲絕島。草木共生長。天空魚龍現。日月照逾朗。歸來鬢髮
斑。如魚在盆盎。豈無搏風翼。烏烏猶顧養。銜蘆東南飛。短

繳漫勞攘。

澄懷云沉鬱

斯人不可絕。大隱多在市。君平與韓康。等一遯世耳。垂簾
讀詩書。賣藥奉甘旨。勞勞者何爲。畢生願足矣。門前扣門
聲。相過二三子。所談無俗情。往往盡名理。時屯豈不惜。樂
事付流水。

黃孝子詩

吾吳有至人。人稱黃孝子。貌不踰中人口。不言臧否恂恂。
鄉黨間靜好。若處女。兩親宦滇南。相隔萬餘里。兵戈方阻

絕異國各疆圍。苟非大師克。相遇安可擬。孝子孱弱質。獨身奮衣起。時維辛卯秋。臘月嚴寒裏。倉皇去家室。慷慨歷城市。由浙經江西。南楚穿湘澧。沅靖至晃州。遂入滇黔鄙。千山與萬山。千水與萬水。春夏秋冬間。寒暑及風雨。豺狼所窟穴。盜賊所結聚。苗獠所出沒。瘴癘所吞吐。兀突骷髏。關縱橫。犀象伍。森嚴奪魂魄。奇詭蕩肝肺。孝子志益堅。鐵石爲心腑。晝夜不休息。疾病不停佇。灑血足彌奮。瀕死神益鼓。大險悉若夷。竟達雙親所。借問從者誰。孤身挈行李。一囊與一蓋。下惟一草履。雙親在絕域。變亂不勝數。土司始發難。流寇旋攻取。全滇如鼎沸。乾淨無寸土。出沒任斧鑕。奔逆階虎兇。不屈幾試劍。再奮復遭縲。大德天所佑。終

幸獲福祚。棲遲白鹽井。萬念成敝屣。豈無鄉井思。妄想徒爲爾。孝子忽東來。彷彿人與鬼。相對牽衣啼。拭淚還驚視。地北與天南。離生兼別死。豈期一日間。骨肉重相聚。隣人滿牆頭。相顧皆出涕。獼獼與焚人。亦非侏儻語。孝子謂大姚。絕域非桑梓。或歸或不歸。兩親慎所處。大姚謂孝子。我亦欲東耳。安能兵燹餘。鬱鬱久居此。顧吾生計竭。誰與贈資斧。我昔多門生。忠難頗相倚。山川遠隔絕。此事當累汝。孝子應聲作。上前再拜跪。更從迤西行。視道真如咫。一進青蛉城。三入姚安治。楚雄及崔慶。劍鄧諸夷部。城墻震頂脊。海水沒腰膂。往返又三千。歷盡諸艱阻。徘徊壬辰冬。歸裝方有緒。門人共祖道。百計猶援止。行行重行行。顧我同

門士并州如故鄉。揮淚不能已。孝子初來時。隻身無伴侶。
艱辛雖萬狀。生死惟一已。此時歸途中。兩親與幼弟。弟或
任勞苦。兩親齒衰矣。早暮須調攝。食飲須甘旨。登涉須扶
持。疾病須噢咻。僕夫四五人。尤難善驅使。知慮苟不周。肘
腋生齟齬。孝子足精誠。一身兼婦豎。曉行問岐路。晚宿探
逆旅。涉水試淺深。登山詢蛇虎。膳飲必親供。枕簟必親理。
溺器必親滌。衣裳親浣洗。倉皇有急難。應變疾如矢。強暴
或窺伺。未形卽消弭。迂迴夜郎境。經旦牂牁壘。嚴關何以
度。失守鎖鑰啓。幽險何以出。蠻夷皆執禮。更有洞庭厄。此
非人所主。檣傾舵復裂。江魚礪其齒。掀天駭浪中。萬斛如
一蟻。須臾竟卒渡。豈曰非神祐。入江雖稍安。風雨蒸溽暑。

親眉未展舒子心。誰能喜。季夏方抵家。始脫征途苦。憶昔
任大姚。實從癸未始。去家十載餘。今適當癸巳。孝子出門
行。亦復經三祀。五百三十日。足迹無寧晷。歷經省凡七。三
十有三府。州縣與衛司。筆不可勝紀。二萬五千程。寸寸
鞋底異。國聞其賢。冠蓋爭倒屣。村野聞其賢。開柵贈錢米。
苗獠聞其賢。跳舞進案醢。盜賊聞其賢。俯首生媿耻。况吾
同里人。寧不羨高矩。一時共激勸。萬戶同哆侈。流傳動風
人。載入宮商譜。村庄八九月。處處築場圃。父老挈兒童。養
社看歌舞。見者爲揮涕。聞者爲誇詡。孝子才孑孑。行葛履。侵
霜趾。兩親在高堂。菽水猶艱舉。葉公好畫龍。真龍反遭侮。
寄語世間人。毋爲渾宗紫。澄懷按孝子名向堅。字端木。吳縣人。父孔昭明。崇禎癸酉。孝廉。

官雲南大姚令鼎革後兵阻不得歸孝子子身往尋備歷險阻至白鹽井遇父母及從弟向巖俱無恙逾一年侍父母歸先生此詩樂府體裁史公叙事氣雄格渾足以扶世翼教木蘭詩不得專美於前矣○憶昔在大姚一段如衆流歸海筆力真可屈鐵非大家不能辨也

銅雀妓

英雄敢欺人大言色無沮築臺本遊觀謬云將耀武二喬不能致美色總塵土三歸表功勳朝夕教歌舞誰知天王家不克庇儔侶月黑昭陽殿複壁窺魂語
魏公晚得志高築起臨漳天命已在躬臺池效文王金珠耀層構銅雀森翱翔房櫳粉黛列戶隔椒蘭芳歌鐘日夕喧不聞讀禪章貽謀有定算寶履及分香

青樓人平生工作偽情人尚無情何況老死魅露盤金銅仙辭漢亦流涕懸知伎人淚不向西陵墜

西陵臺之西綿綿復纍纍美人高臺上朝夕朝靈几奏樂舉哀聲欲淚還復止疑塚七十二哭向何者是抱頸有嗣王辛君知我喜矧茲臺中人行雲逐流水石馬碑未出銅雀臺已圯止餘臺下瓦磨墨編青史澄懷云四詩史論錚錚一讀一快不必更

楊爾京刻子宗祭禮成賦此致謝

人生有宗族如山水支派山從崑崙來水自星宿沛支勞派既別流布滿大塊及其溯厥始原本燦然在追維生民初受姓族始大堯舜及三王宗法儼不壞如何秦漢後骨

肉漸分背。同堂若參商。手足成敵愾。程朱慨然念。有志而未逮。至今家禮中。稍亦示其概。嗟予本愚蒙。深慮俗姓晦。斟酌古今宜。聊爲本支誨。分合視親疎。遠近起隆殺。豈敢冒僭辟。王化實攸賴。毘陵爾京氏。一見契所愛。方欲整厥族。兼實啟其會。兼謂此至理。羣倫所共快。有身則有宗。誰復能自外。紆工具梨棗。願與公覆載。維此古人心。今日不可再。何當推此志。其整大小戴。鄉國及王朝。集純去其倍。坐令此世中。復見古三代。此種詩有碑名教不在語言之工

送閩中林衡者遊中原長歌

石齋先生天下師。君能弱冠長揖之。著書如風腕欲脫。論鑿鑿稱雄奇。石齋爲君亦拱手。咨盡形骸呼小友。贈君

藥言送君詩。直欲與君分半畝。石齋贈詩有應分天公天半畝與君居之句公何不仁。忠臣旣死。英雄貧嶺雲如山。戰骨白至今。閩海飛征塵。男兒致身苦不早。雙髯蹉跎渾欲老。安能跼蹐輟下駒。鳳凰翱翔在蒼昊。束書躡屩作壯游。志氣直欲凌九州。扁舟千里入吳會。上書論古驚同儔。腐儒如子那足道。感君意氣爲傾倒。揮毫贈我琅玕辭。愧乏瓊瑤無以報。君今策蹇問中原。山川漫漫道路昏。胡琴欲掙向何處。夜半起舞心煩寃。金陵城中王氣盡。蔣山斷樹生芝菌。日落江潮慘不波。維揚明月歌春蚶。君不見昔日江東祖士雅。擊楫中流淚盈把。又不見遼東白帽翁。語維經典甘孤窮。丈夫處世只兩途。吾子坎壈將安終。中原人才頗不惡。風塵

往往傾然諾。昂然七尺未長貧。暗中定可相摸索。歸來好
復過桴亭。西窗剪燭開短屏。交知四海見吾子。相對使人
雙眼青。鬱鬱碑碑不
數斫地悲歌

月下聽姚虞生鼓琴時予正學琴虞生也

新秋雨歇天微涼。薄雲初月流素光。虛堂無人四壁靜。虞
生爲我鳴清商。瓊林風過聲琳琅。遙空飛來雙鳳凰。山林
杳冥不可識。海水瀕洞魚龍翔。君不見宣尼昔日師師襄。
聲音之中見文王。黝然而黑頤然長。精神相遇無何鄉。吾
徒何爲昧此理。論宮道微空傍徨。曲罷無言三嘆息。如在
羲皇遊化國。請君爲我一再彈。太古希音世難得。從來聽
琴詩但
寫琴聲琴韻此
獨能寫琴德

寒溪書屋歌爲盛子聖傳作

寒溪先生趣超俗。閉門自住深巷曲。繞溪種竹千百箇。終
日無人弄寒玉。舍北舊有古祠廟。東風三月春窈窕。游人
連臂踏青來。君亦時時恣舒嘯。今年僧去祠廟空。廟前石
砌野花紅。長溪淼淼靜如練。琉璃一片光無窮。先生爲愛
此溪好。自笑向來溪水小。更移書屋祠廟傍。坐挹清溪日
傾倒。編籬伐棘遠囂塵。乞竹尋花問四鄰。筆床書架參差
置。藥臼茶鐺次第陳。况有從遊多雅士。負書挾冊輕千里。
北海還家吾道東。西河受業如歸市。朝吟不厭溪上雪。暮
吟不厭溪上月。朝朝暮暮讀書聲。人影溪光兩清絕。同心
老友四五人。暇日相過愜隱淪。卽事詩成常滿壁。應時酒

熟每留賓。人生所貴在適意。富貴浮雲何足計。長安卿相
天上人。反覆須臾成委棄。虞淵日落天昏昏。蠅蚋羣飛各
自尊。草頭露濕生羽翼。笑傲北溟無鵬鯤。丞相車前堪炙
手。五侯門第濃如酒。競附城南尺五天。爭夸牖下千金帚。
花落花開亘古今。繁華俄頃易消沉。不如溪上垂綸手。靜
對寒流自洗心。澄懷云詩亦清絕

前早

赤星如拳耀斗邊。去年巨浸猶稽天。大水之後必大旱。逆
知此歲多迍邐。詎意夏初頗雨水。五月插秧農事喜。自從
大暑雨澤竭。兩月纖雲都不起。不惟無雨兼無風。絳霞如
火朝朝紅。池塘水竭魚鼈死。樹頭葉盡蕊飛盡。翻車老農

背如赭。流血津津裂。雙蹠擊鼓燒山龍。不醒暴虐焚祝神。
空下邨中父老心。恒絕五步一拜脛。欲折柳枝盤頂手。擎
香萬口叫天天。不徹三吳古來號。澤國不憂旱。曠憂堙塞
三江成陸。百川平。縱值豐年常菜色。今年蠲賦聞劉河。飢
黎百萬舞且歌。江流初復遠。遭旱杯水難。救車薪多况復
渾潮挾沙入海。強河弱沙還。集水利名成難報。荒仰頭空
對蒼天泣。香山體格道州心事

乙酉元夕婁城盛張燈火有感而賦

塞北旌旗亂江南。采色多敷天。猶有淚薄海。但聞歌遊女。
飛金爵。王孫曳玉珂。太平誠足樂。九世奈仇何。氣局高渾直逼少陵

歸村

聞道歸村好。歸村竟若何。大都塵市少。只是水田多。漢臘存農社。離騷入棹歌。吾生方卜隱。策杖擬相過。

自錢塘至常山溪行

清溪七百里。日日鏡中行。有水皆鋪石。無山不入城。千村紅樹色。一路畫眉聲。安得嚴灘老。相攜足此生。

張睢陽廟

捍禦功勳烈。江淮廟貌尊。一時羅鼠雀。千古祀雞豚。天地心猶在。風塵色更昏。英靈如可作。慷慨欲同論。縱筆寫來氣象籠蓋

宇宙後半開拓尤見作意

贈石敬巖將軍

敬巖劍稍為天下第一子從之受學惜未盡其術

將軍結髮已從戎。四十餘年立戰功。十月冰霜孤塞外。九

秋風雨百蠻中。但期戮力同劉杜。劉純杜松公曾與同事豈料終身

類李馮。執政無人君莫恨。江湖知己尚難逢。澄懷云桴亭謂洪武正韻

宜遵用蓋不忘故國之意也此首乃用正韻

寄確菴時方歸蔚村

海門風雨暗江關。九十春光一瞬還。念子高翔雙鳳里。憐

子獨臥九龍灣。時窮彌識浮生薄。世亂方知道義艱。同學

少年今漸老。感懷不覺淚潛潛。

夜雨宿吳門卽事有感兼呈李灌溪先生

胥江夜雨漲痕高。震澤長風起壯濤。海上有人占蜃氣。橋

邊無客問龍韜。十年廡下憑誰識。百尺樓頭未足豪。時與灌翁

同宿準提菴小樓獨往獨來成底事。棹歌聲裏讀離騷。桴亭七律以氣爲主

不脣修詞琢句而揮洒磅礴流轉如意海涵山負鳳舉鵬
騫嗣響杜陵在神不在貌也。澄懷按灌溪名密兼工書
法

和侯掌亭舊莊雜感

黃帽青鞋挂短筇。萬方多難我何從。秋風叢菊荒三徑。春
草空堂剩四松。嶺海衣冠猶在眼。園陵霜露漫沾胸。伯通
去矣無來者。莫道梁鴻不賃春。

客裏風霜閱歷深。蕭蕭兩鬢歲華侵。蘄王壘下千秋恨。
有蘄王奉使槎邊八月心。此地又蜀道屢歌相和曲。草堂
點兵臺重作喜歸吟。南飛烏鵲知多少。明月疎星淚滿襟。

遙哭希聲錢公公。叟舊令也。申西之難間。關嶺海卒
死王事。葬海中之瑯瑤山。其二弟肇一兼三負遺書

至婁因賦一律以誌思慕

營頭夜隕海濤奔。眞宰茫茫未可論。絕島君臣留正朔。瘴
天風雨葬忠魂。誰將心事傳龍比。賴有遺書屬弟昆。千古
崖山成恨事。臨風遙慟一傾尊。

次桓移居胥山之麓自名胥江草堂索贈

越國春深橋李城。胥山山下江橫。南州高士新開徑。吳
市英雄舊駐兵。帆影落窗晴欲暝。濤聲入簾夜還驚。浣溪
莫漫誇名勝。此地滄桑眼倍明。

喜宋子猶從海上歸賦贈

十年蹈海一身輕。故國重回代已更。夢裏鯨波如昨日。尊
前鮭菜只平生。乾坤何處容孤往。邱壑吾儕且耦耕。遊世

功夫正無限可能相助一經營澄懷云激烈悲歌聲滿天地胸吞雲夢奚止八九哉

萬卷樓同扶九甫草夜飲

萬卷樓開暮靄天披襟此夕對高賢一時人物雲中宦千里交情雪後船震澤長風吹劍氣包山秋色在詩篇却憐寂寞江亭下剩有畸人獨草玄

次韻答歸元恭

側身天地此何時忽漫相逢得子期我輩有心常自合世人無膽輒稱奇義熙日月柴桑老景定詩篇鐵匣知聞道昆明池正好眼中猶見漢旌旗澄懷按元恭與亭林齊名人有歸奇顧怪之曰先生集中屢與元恭唱和獨于亭林無隻字贈亭林家崑山先生家太倉相去百里而近兩賢若不相識者是亦一奇

同葛瑞五遊吾谷

湖山久絕剡溪舟忽漫相過續舊遊樹裏波光高出屋松間日色冷于秋軟輿素舸芳時樂石馬穹碑故國愁惟有丹楓如血淚年年和雨滴荒邱杜老哀江頭縮本

清明

二月輕寒又禁烟郊原祭掃正紛然桃花欲放鶯初語楊柳新垂燕可憐杜老春衣頻白典漢宮蠟燭有誰傳十年樵牧冬青老寥落東風怨紙錢

次韻挽瞿稼軒歸葬

稼軒為桂林留守死難贈臨桂伯其孫扶柩歸葬

半壁崎嶇獨護持神州戮力更同誰死生在我終須盡成敗由天詎可知高密汾陽嗟異代崖山燕市痛今時煌煌遺表垂千古伯仲之間見出師稼軒被拘時有遺表

砥柱乾坤賴老謀。那堪宰相盡風流。橫江已斷千尋鎖。籌

國誰開萬里樓。南粵兵戈行殿恨。東皇花木故園愁。稼軒

鄉于桂林作別渡河只有宗留守。慟哭相從地下遊。

與亡自古恨難平。獨委孤臣坐廢城。二祖山河猶破碎。兩

朝門戶尚紛爭。偷安列爵多勳鎮。粵中勳鎮甚多兵共難

無人剩友生。司馬張別山稼軒門人泗水殉節捐軀吾立

命。豈將一死浪求名。稼軒臨難時有詩云死

累葉君恩世澤長。男兒終不負堂堂。四年絕域延宗祏。丁

定策至庚。萬死危疆奉御床。浩氣成吟詩不朽。公臨難詩

寅凡四年天風吹櫬骨猶香。精忠率土人人敬。化碧蕞引底用藏。

公懺歸後潘泉○四詩沉鬱頓挫光焰萬

和許南村新成書屋

新成小築傍溪灣。一徑斜穿竹色斑。子美草堂原兩地。放

翁老屋只三間。桔槔人散村流靜。機杼聲高月影閒。隨意

田園風景好。避秦何用覓深山。和平之音

重陽後一日含綠堂雅集

茱萸插罷酒還沽。餘興龍山尙未孤。萬古乾坤皆草莽。一

時人物在菰蘆。月泉開社天星聚。鐵匣緘詩并水枯。宇內

誰成三不朽。壯心空老北山愚。無限酸楚出以傲兀之筆

過陸退菴村居

中原勳業竟蹉跎。十載田園兩鬢皤。聚米山川成幻夢。封

狠心事付悲歌。樵童漁父徜徉老。酒棧詩篇感慨過。賸有

床頭雙劍在夜深。風雨自摩挲。丹心壯志鬱勃流露

和袁景文白燕詩

故壘雕梁事總非。空巢林木亦應稀。聞心已逐眠鷗任。素羽還隨化鶴歸。擬向山中依白社。羞從巷口傍烏衣。春風盡入昭陽殿。秋老湘南獨自飛。自寓高潔復極體物之工視原作有大家名家之別

辟疆園畫社卽席分韻

舉目青山是處愁。桃源漁父路悠悠。峨眉風雪林巒迴。海嶠雲霞島嶼浮。欲共向平樓五岳。誰從陶峴借三舟。不如坦腹長松下。欹枕看圖作臥遊。落落大方不爲律縛

過梁溪東林書院舊址

東林書院古城隈。聞道當年海內推。鄉里程朱聊自淑。朝

廷洛蜀已相猜。忠良既逐奸邪盡。宗社旋隨黨錮灰。自古人亡邦國瘁。夕陽衰草有餘哀。中二聯立論平允真不愧南董之筆

憶家園桃樹

忽憶故園春色裏。遶溪三十樹桃花。輕寒薄暖好天氣。深綠淺紅堆曉霞。村釀三杯午睡醒。風亭一榻客談賒。而今寂寞江城晚。愁對西峰落照斜。格調超脫

龍津春漲

百里修江極望來。環村帶郭水滌洄。連朝不斷千峰雨。一夜爭奔萬壑雷。無數落花成錦浪。滿前輕綠發新醅。春畦最是三農喜。坐聽歌聲處處催。

五日龍津觀競渡 四首錄一

昆明初鑿漢宮池。武帝雄心寄水嬉。一代軍功存內政。千年畫鷁競河湄。長江已不分南北。壯士何勞習鼓旗。回首西山紅日黯。暮雲飛雨過城陴。繁麗題發出如許感。慨洪鐘無纖響也。

出鄱陽泛大江作

一葉橫過彭蠡秋。大江東下接滄洲。半天劃界開長壑。萬里奔山送急流。南國君臣常恃險。北來車馬每生愁。靖康渡後虛名失。不用投鞭穩放舟。一氣直下真射鷗縛虎手。

山中曉行

春陰白雲滑。曉露松花香。飛流濺不盡。石氣生清涼。

訪俠者不值

狹巷訪要離。人逢問阿誰。英名天下識。里閭不相知。

梵鐘

遠寺一聲鐘。千門動機杼。殘月下林梢。露濕行人語。

題畫鳳

獨向高岡擇木棲。更無鴛鴦與相齊。一聲叫徹虞廷日。天下鴟鴞不敢啼。此先生十二歲作。爾時已有擔荷道統氣度。

偶念熊芝岡有作

履霜自爾至堅冰。今日何須重嘆驚。二十年前檀道濟。中原已自壞長城。澄懷云崇禎中又誅袁崇煥是再壞長城矣國勢安得不日蹙哉。

中夜聞桔槔有感

東村夜夜桔槔聲。月落星橫尚未停。鼓角高衙眠正穩。天明飛檄下嚴城。按此詩亦用洪武正韻。

過寶帶橋

澹臺湖水綠如油。寶帶橋平正練浮。好種碧桃三萬樹。年年花裏作春遊。

過釣臺有感

羊裘澤畔老編氓。天子親迎不肯行。漢室山河今在否。釣臺終古屬先生。

附錄

陳瑚十首

瑚字言夏。太倉人。父朝典。以經行重鄉里。先生少稟家學。通五經。讀書不屑章句。凡天官河渠兵農禮樂。以及壬奇諸書。無不貫穿。旁達崇禎壬午。領鄉薦。明

年江南大飢。上當事救荒。四政支吾。三策搯腕。皆政著私議十條。續議五條。言皆切要。或勸上之。先生曰。此非借箸時也。明亡。奉父避地崑山之蔚村。躬耕以養。村田沮洳。先生導鄉人築岸禦水。歲獲豐穰。與居人陳說孝弟之義。及爲善三約。衆皆悅服。嘗於元夕集數邑之士。講乾坤二卦。闡明聖學。遠近嚮風。游其門者多俊偉英畧之士。論者以其盛比河汾焉。先生操履端介。冬月常衣單袷。客有重裘者。欲解以贈。竟席不敢言退。而語人曰。吾乃知當世有陳無已也。國初。詔舉山林隱逸之士。州守白登明將以其名上督撫。先生力辭。乃已。卒年六十三。門人私謚安道。

先生蔚村人立祠祀之巡撫湯文正公斌卽其故居
爲立安道書院其著述多散失有確菴集又有確菴

日記講學全規

婁東詩派曰苻亭詩以渾灑勝確菴詩以沉雄勝各
造其極可謂工力悉敵

送吳與公移居下邳

我非陳孟公君乃吳季子千金重一諾結交有終始仗劍
作遠游欲爲報仇死惜哉不遇時長嘆歸故里其事雖不
成其名滿人耳澄懷云知此可與讀荆軻傳

讀陸道威八陣發明寄贈

吾聞龐德公寄跡鹿門野臥龍每從之墮然拜床下床下

何如人死乃床上春時無三顧勤沒齒同嗜唾身隱焉用
文此言信非假澄懷云語見身分寄託非世俗標榜可此

贈文介石

長江鐵鎖竟何爲中夜旁皇泣素絲畫日爭隨降表進草
元人恐獻文遲武陵洞口桃花笑朱雀橋邊燕子知獨有
孤忠老博士焚冠和淚寫新詩三四可愧孟津諸人五六尤妙在諷刺蘊藉
荒城斜日數歸鴉南望愁雲不見家五夜杜陵驚鼓角十
年庾信老風沙瓜官粟吏看人事鹿苑雞園度歲華傳道
故山春色好烽烟無恙有梅花

李映碧廷尉遺地圖

圖畫山川感慨多邊陲風景近如何入關無復蕭丞相聚

米空思馬伏。波兩戒一江。橫似線九州。五嶽小於螺。錯疑
留守。魂歸夜風雨。聲聲喚渡河。沈確士云讀至末語紙上有聲恐流連光景者不能

作亦不解讀

送翼王歸膠

梅花燈火對深宵。門外西風起慄颯。今夜角聲催舞劍。來
朝木葉送歸燒。幼安遼海人空老。臯羽西臺怨未銷。同是
天涯離亂客。幾回腸斷練和潮。

讀烟客先生西田詩卻寄

宗彝祖笏舊時春。白紵烏衣別業新。杜甫正當天寶日。陶
潛終是義熙身。亂離風物添佳句。蕭瑟江關老世臣。詩
桃花好相待。可知儂亦避秦人。

山中喜遇徐昭法共食

一夜寒香萬樹開。相逢花下且銜杯。窮途兄弟難成醉。故
國風烟易入哀。雪滿山中蘇武窖。雲橫江上謝翱臺。寸心
不盡斜陽晚。濕徧青衫首重回。

通暉樓詩爲松陵沈建芳作

危樓百尺五湖東。亂後天涯極目同。宛馬曉嘶芳草路。杜
鵑春恨落花風。有無人物菰蘆裏。多少山川鼓角中。解道
仲宣工作賦。愁來閑凭夕陽紅。

得長沙劉杜三書

故人消息隔江天。忽有雙魚萬里傳。南岳雲埋仙骨在。西
臺月照客星懸。銅駝宮闕三生夢。玉樹河山六代烟。莫漫

投書弔湘水酒杯潦倒送餘年

村 濬 二十八首

濬字于皇黃岡人明末副榜貢生少有志節不務俗學國變後僑居金陵時往來淮揚間食貧苦吟以老歿後陳恪勤公鵬年葬之太平門之麓于皇論詩極嚴於時人多所排詆有富人重價購其集而焚之後鄉人某搜得其遺藁行世蓋不及十之三云

朱錫鬯曰啓禎之間楚風無不效法公安景陵者茶村獨以杜陵爲師是亦豪傑之士惜其阨窮以老孟貞曜所云好詩多抱山也
沈確士曰茶村七古頗近頽唐又聞秦淮燈船鼓吹

歌以此得名其實頽唐之尤者也

汪端論曰茶村詩逸情孤詣迥出塵表奇崛而絕雕刻警健而謝犒豪雖邊幅少狹要不失爲賈長江周大朴乾隆中詩家主性靈者排詆不留餘地雖異虬蟬撼樹不免蹈是丹非素之病矣

嵇康

嵇康人中龍義不可當世視彼盜國臣伎倆如兒戲吐辭薄湯武千載有生氣臨命索琴彈聊示不屑意

登金山塔

極目非無岸滄波接大荒人烟沙鳥白春色嶺雲黃出世登初地思家傍戰場咄哉天咫尺消息轉茫茫

薄暮難爲狀。空中別有聞。懸燈江海合。望月水天分。寥廓
身何往。飄零興不羣。向來峰頂色。看作下方雲。沈確士云
蒼蒼莽莽

焦山

觸處迷人代。茲山尙姓焦。上頭仍棟宇。到眼忽雲霄。樹色
南徐近。江聲北岸遙。衣冠留洞壑。不必訪松寮。
出郭來差遠。憑高望獨深。江分神禹跡。海見魯連心。密竹
藏金像。回流灌石林。擬尋幽絕處。却誦白頭吟。

聽軫石琴

江雲飛不盡。流水上空堂。寂歷人誰在。颼颼曲自長。哀猿
吟雪嶺。匹馬弔沙場。此意吾能識。憑君鼓數行。

冬夜宣城梅杓司過訪留宿寓齋

北風今夜急。吹月已成霜。愛月嫌風色。開樽閉草堂。故人
宛陵秀。襜被况相將。經歲纔同夢。寧知更漏長。格律老成
語能獨造

送友

別離三十年。相見各皤然。尙有論文興。而無沽酒錢。客中
吾送子。江上水連天。世路多荆棘。行行必慎旃。

九日晚集因圃

弦後添明月。霜前作好秋。石欄分送酒。林杪一登樓。白鴈
初傳信。黃花豈共愁。歸心涉江水。清絕正東流。
佳節思親句。尊前詠不忘。自從失荆婦。誰與製茱囊。地僻
愚兒女。天寒信酒漿。舉頭窺過鴈。飄忽不成行。二詩饒粗
服亂頭之

致

晴

海角收殘雨。樓前散夕陽。行吟原草澤。醉臥即沙場。騎馬人如戲。呼鷹俗故狂。白頭蘇屬國。只合看牛羊。頗有幽并豪傑之氣

秋日同靜能前民上雞鳴寺後湖亭感興兼懷蜀友

范仲閻昔年宴集此亭

樹力支危榭。山形遶禁湖。絲來天地意。不厭白鷗孤。綺席人誰在。臺城草自鋪。好留明月照。輦路傍藤蕪。

清涼山寺逢僧號掃葉者贈之以詩

掃葉幾時盡。秋風秋雨多。四山聲不斷。一樹寂如何。定日淵同帶。霜天靜養柯。翻嫌丈室裏。花事惱維摩。幽寂至此畫亦難到

過蔣子

維舟折桂花香色。到君家。露氣激秋水。江天卷暮霞。南軒人去盡。碧月夜來華。寂寂忘言說。心親一椀茶。蕭灑澹逸

金山曉陰有懷亡友王二雪蕉

夜潮喧達曙。漠漠散春陰。海氣昏南北。鐘聲變古今。轉看鄉思減。何故客愁侵。嘆息鍾期去。空餘山水音。

北固

西郊諸嶺現北固。稱其名。石壁憑空下。江天插水生。鳥飛孤閣半。人上翠微平。有處金焦合。辭山更遠行。鍊字生新不下賈島

招隱寺

隨風深入谷。遂上讀書臺。古木門前逕。清泉石上苔。也知

春漸好。未必客頻來。草草尋遺跡。山花去後開。以下數首疑非食烟火人語而氣魄自大所以為高

白龍洞梅

覓洞披榛入。探梅傍虎行。地偏鐘鼓寂。春霽雪霜生。聞說人稀到。能無鶴自鳴。下方歸路晚。暗覺旅魂驚。

山行訪梅不得到竹林寺

飲泉心未足。出谷復何之。欲問竹林路。樵人亦不知。遠江雙鳥去。落日一峰欹。為覺梅花近。山風故故吹。

真州新城見桃花留別軫石前民

倚棹望遙天。明霞漲一川。同驚分手日。莫記種桃年。綠是江南樹。青為渡口烟。無勞更相送。緩緩問歸船。

元夕江樓看月

星火夢瓜洲。燈時得勝游。難逢今夕月。復此大江流。碧浸三山影。烟含萬古愁。夜深誰擊楫。吾道在漁舟。

雨後集含露堂言別

桐柘交陰徧。蕭然雨後秋。過從含別緒。言笑隔時流。古意淮南葉。他鄉劍外州。十年對知己。今日更淹留。王貽上云不減古作

讀東坡集

堂堂復堂堂。子瞻出峨眉。少讀范滂傳。晚和淵明詩。王貽上云二十字說盡坡公一生

泰州

窮海三秋盡。扁舟百里行。夕陽無近色。偏照遠帆明。

礪邊

紅葉無風猶著樹。青松媚日自生烟。鐘聲出塢清如水。早有幽人立礪邊。一幅有聲畫

道中見棲霞

日極危巒日下春。茅君廟裏幾株松。心知不及中峰宿。今夜猶聞寺外鐘。

紫峰閣

一閣窗收四面峰。峰峰秀削紫芙蓉。夜來更不妨明月影。裏鬚眉盡是松。

白雲菴

松篁自結一幽蹊。積葉柴門咫尺迷。我記白雲菴去處。過

山又過小橋西

徐夜五首

夜字東癡初名元善字長公後慕嵇叔夜之為人改今名山東新城人明末諸生 國朝康熙中舉博學鴻詞以老病辭有嵇菴集

王貽上曰東癡余叔祖季木公外孫與余兄弟為外從兄弟詩格自然處類韋左司巉刻處似孟東野余日之為礪松露鶴又曰東癡少時作樂府云轆轤鳴井深淺樓高高去何遠長白黃山人善琵琶嘗為譜之又曰東癡年二十九棄諸生隱居東臯鄭潢河上掘門土室絕跡城市有朱桃椎杜子春之風

詠懷

凡骨難遽化。仙藥不可求。一身為物役。未可輕王侯。曠土洞達心。無為生遠游。遠游亦有方。九州非一州。常恐血氣軀。車馬生墳邱。試聽蟪蛄聲。語默成春秋。山嶽自終始。江海日夜流。王歸云。車馬生墳邱。與大梁土中所得古石刻。日月逝。酒漿五字。相類似。仙靈語。

九日得顧憲人書

故國千年恨。他鄉九日心。山陵餘涕淚。風雨罷登臨。異縣傳書遠。經時怨別深。陶潛籬下菊。誰復繼高吟。沈確士云。寧人先生

遠辭故國。常若山陵。起四語。一氣貫。詩社陵遺法。

秋柳

搖落江天倍黯然。鶯啼鴉噪夕陽邊。誰家樓角當霜杵。幾

處關程送晚蟬。為計使人西去日。不堪流涕北征年。孤生焦萃應相似。怕見殘枝帶暮烟。沈確士云。蕭瑟之音。不粘不脫。遠勝漁洋名作。

富春山中弔謝臯羽

唏髮吟成未了身。可憐無地著斯人。生為信國流離客。死結嚴陵寂寞鄰。疑向西臺猶痛哭。思當南宋合酸辛。我來憑弔荒山夜。朱鳥魂歸若有神。

孤山坐放鶴亭下

巋然一嶼水迴環。想見高風物外閑。墓上海開春又老。亭邊鶴去客空還。書無禪草逢當世。祠有名賢擅此山。占斷西湖皆宋土。羨他生死太平間。沈確士云。結意言外。見南渡之西湖。不堪栖隱也。

明三十家詩選初集卷八上終

明三十家詩選初集卷八下

陳元孝 四十四首

錢塘 江端 允莊輯

元孝廣東人操行介潔博學工詩以隱終有西樵艸堂集

彭躬庵曰元孝詩諸體兼擅手觸肩倚莫不中窾意格渾成發人神悟

王盤麓曰元孝詩如哲匠當前衆材就正梁棟榱題各適其用

王貽上曰元孝詩清迥絕俗如積雨江漢綠歸心楊柳初帆隨南岳轉雁背碧湘飛映花谿路閉漱水石

根虛離憂在湘水古色滿衡陽
枕鄒過雨垂空地瑋瑁乘潮上
古城三徑草生殘雨後數家門
掩落花中之類皆得唐人三昧

汪端論曰元孝詩意在筆先力透紙背五古出入漢魏七古不屑摹仿杜韓而縱橫變化實兼擅其勝五律氣格高古七律奇警蒼涼明季嶺南哲匠輩出若元孝者又鄧林珠樹元圃夜光也

登祝融峰

祝融高不測雲雨及其半濛濛在太古乾坤猶未判九州有餘覽旭日夜中且臨睨懷百憂因高發南歎奇拔似杜陵望岱詩
下祝融峰向白門寺道中作

披離中林雪厭挹下山路緣高凜若墜身外不敢顧藤蘿援我行飛鳥爭我度我下羣木鳴我上寒雲沍迹從浙溪遠心與幽賞住萬里方自今重期豈能預遲遲聞遠鐘慄慄日將暮梁崇一云善學老杜

王將軍挽歌

南方有義士姓王名曰興十三學殺人十五手搏狼三十建義旗姓名驚一方天子錫虎符作鎮鼉江陽翠華日已遠地絕軍彌張百戰環岡州九死披殘疆海濱富斥鹵重林與連岡高者掩雲日遠者浮蒼茫煮波致財貨鑄冶成刀鎗宮室何所居天家侯與王藁粟何所饋從駕子與孃心膽何所贈海內豪與英獻客合浦珠薰客珠厓香客處

未覺寒。襖禡先盈箱。客寢始覺單。妻妾忽侍傍。敵兵四面來。衆士各逞強。將軍躍上馬。命客持一觴。獨出揮長戈。兩日流電光。直取首來將。生挾歸戎行。顧飲所持酒。昔熱猶未涼。相持及三月。敵騎皆奔亡。來時三萬人。半還仍重傷。奏功自間道。涉瘴徂昆明。黃金三千鎰。玉帛各有筐。天駟方驅馳。下臣效芻蕘。臣興昧死上。帝曰興卿良。賚爵列五等。高獸盤銀章。其文曰虎賁。將軍盪南荒。敵人聞之懼。選士盈千旗。來者左右賢。其帥督責之。不得此彈丸。若輩何生爲。上天何不佑。其年兼薦饑。將軍察天命。命匠搜良材。斲以爲巨棺。綵翼懸葳蕤。約日出合戰。敵怯不敢來。堅壁十里外。迤邐與長圍。溝壘內外防。突援無所施。始從戊戌

夏。雨及中秋期。戰士飯草土。抱骨還登陴。所憂負將軍。吾儕死猶歸。將軍曰嗚呼。其盡終何裨。我乃報深恩。汝當全宗支。乃命幼子九。先出卑其辭。卜吉結歡會。敵將不致疑。是夜一更終。將軍訣所知。皎月當中天。千秋同此時。語已還。閉門沐浴更衣。夫人翠鳳冠。有母頭如絲。侍妾十五人。左右皆肩隨。肅肅何離離。俱集園東陲。上有古梅樹。膠結垂高枝。白石爲几席。月露明蒼苔。將軍命夫人拜別而慈闈拜畢。與將軍四拜中間居。十五妾羅拜窈窕無參差。夫人命斗酒。有脯形如圭。深藏待今夕。各當行一卮。卮盡且先起。母與君稍須將軍及。母入燭影何迷離。夫人十五妾自挂臨中閨。阿母大驚呼。將軍言勿悲。着我錦繡袍。麒麟

麟當心開戴我七梁冠簪纓鬱崔嵬玉帶與璽書次第皆
抱懷置敕中堂上花燭榮且輝望闕遙謝恩臣死有餘辜
下塔十二拜天地及四隅徘徊望西堂有虎顧其兒平生
愛此圖拜汝今同灰卷圖附敕下釋服趨房間房中何穹
隆火藥堆如山將軍踏小几自解夫人纓次及妾十五列
寘火藥端出戶着朝衣捧敕仍來還一聲母急出火烈焰
貫天雞鳴部曲入白骨空嶮岬舉哀建素旒合斂歸巨棺
敵人亦流涕沉在同肺肝卜葬三山陽隱約題墓門陳子
作輓歌播之永不刊

表揚忠節情狀如繪源出焦仲卿妻詩而道鍊過之

耕田歌

耕田樂耕田苦樂哉樂有年苦哉不可言春未至先扶犁

霜華重土氣肥春已至農事始雞未鳴耕者起泥汨汨水
光光二月稻芽三月打秧五月收花六月垂垂黃再熟之
田始有望三月打秧六月嫗草一熟之田九月始得穫稻
近路畏馬馬食猶寡近水畏兵兵刈何名上官不待熟不
熟昨夜取錢今取穀西鄰典衣東賣犢黃犢用力且勿苦
屠家明日懸爾股

梁崇一云讀之令人憤鬱

日本刀歌

白日所出金鐵流鐵之性剛金性柔鑄為寶刀能屈伸屈
以防身伸殺人星流電激光離合日華四射瞳瞳溼陰風
夜半刮面來百萬愁魂鞘中泣中原歲歲飛白羽世人見
刀皆不顧為恩為怨知是誰寶刀何罪逢君怒為君晝盛

威與儀。爲君夜伏。魍與魎。水中有蛟。貫其頤。山中有虎。抉其皮。以殺止殺。天下仁寶。刀所願從。聖人沈確士云與藥亭作用意各別而尊崇中國。指歸略同。勿但賞其能作驚人語。

祭幽歌

天低野黑。鐘磬冷。高臺火炬紅。無影招魂竹竿垂。至地萬衆無聲。大師睡。林根水際。光宵冥。欲動不動。如有形。陰風吹沙利如箭。蚱蟻橫飛。撲人面。鬼王丈六鬚髮丹。金鈴召鬼爭盤餐。黃香插筵。月晶晶。瓦簋不盈。紙衣小。倏如聞笑。忽而啼笑。何丈夫。啼女兒。殘形敗血。生荒草。有棺無棺。安可保。骨肉當前。喚不聞。半夜依人思一飽。綠楊絲繞白楊樹。魂來作風歸。作雨西頭落。日東頭來。後人仍爲今人哀。

光怪陸離奇語百鍊是李王孫古錦囊中物非畫地獄變相者可比

柏舟行爲區母陳太君賦有序

太君愧峩陳大夫之女也。許適見五區大夫之子。寶震文學。文學早卒。太君當未笄之年。矢靡他之節。於今五十矣。同人嘉其志有成。繪圖爲祝。予旣爲之序。復作此歌。

柏舟兩髦猶可儀。陶嬰黃鵠會雙飛。夫人爲婦已頭白。眼中未識君容輝。自言生長大夫女。經史胸襟炳如炬。父母有命兒有心。縱不言承己心許。心期頡頏同一林。天教殊絕成辰參。人生意氣貴一諾。妾寧負天不負心。妾父有男妾有姊。君家大夫只一子。有妻於俗得立孤。無妻爲殤終

已矣。素車白馬入君門。由來爲義非爲恩。身安分命甘若
齋。半生衣枕無啼痕。當年十五今五十。嗣子成立皆有孫。
嗚呼男兒陷胸絕脰死容易。就義從容人所畏。青閨冉冉
盛年徂。寸心一矢終不渝。千金之劍贈墓樹。至今談者猶
區區。何況贈以千金軀。乃知未仕報韓者。古今所以爲丈
夫。沈確士云區大夫只一子無妻不立後則後
絕矣此陳太君能見大義處詩中曲曲傳出

送屈子之金陵

地何必生山川。天何必有日月。一升一沉使我老。南北東
西令人別。洪河之水孤蓬根。不知似我還似君。神州蕭條
寰宇黑。英雄失路歸何門。文章亦是千秋事。與則爲雲降
爲雨。雄劍高飛雌劍留。夜上金陵望牛女。梁崇一
云突兀

贈余鴻客

蜀犬不識日。羣吠聲狺狺。越人賤章甫。不以易文身。中原
龍戰二十載。萬事反覆如朝昏。我行驚懼伏草莽。舉國大
笑爲愚人。何來年少金陵子。肯道相思滿人耳。三年覓我
二樵間。一夕逢君五羊市。傾山倒海見胸臆。白日照耀肝
腸裏。羈貧無酒畱君歡。對坐江樓饑不起。是時積雨江上
晴。丹楓亂落寒蟬鳴。長風駕浪作邱壑。蜃樓海市相崢嶸。
趙佗朽骨爲黃土。陸賈詩書亦何補。朝臺空有漢家名。浩
歎今人不如古。今人古人間。容髮舉足之分邈。燕越眼前
得喪等。煙雲身後是非懸。日月怪君茂齡懷抱奇。嚴君風
義兼能詩。曾窺一二每心折。安得天馬無龍駒。荒城氣黑

落日短。強爲吾子停斯須。如君意氣復何道。所願故心終不移。淋漓慷慨

端州閱江樓

牂牁之江千里來。羚羊峽口一線開。長波鼓盪氣不洩。沙邊吼怒成風雷。五月六月西潦至。端州古城晝長閉。卽今水落洲渚高。急流尙作奔揚勢。誰飛傑構臨江隈。下有孤石名崧臺。崇基崢嶸山岳立。古榕詰屈蛟螭迴。百道文窗浮木末。四樓角立何軒豁。曲閣周流復道長。高廊回注空階潤。猶憶登樓髮尙髻。樓前親見海龍朝。萬乘旌旗屯北郭。千官車馬聚寒潮。二十年來重繫舸。淚滴闌干獨愁我。白雲飛盡蒼梧深。滿目寒山日西墮。

歸舟

水氣動羣木。虛樓飛葉聲。風燈無定焰。峽月不終明。託宿維舟夜。臨瀧未濟情。寸心平自若。應任險中行。似少陵秦州詩

葉世穎重之中湘茅屋行後有寄

楚國木葉下。故人行有霜。離憂在湘水。古色滿衡陽。幾日歇蘭棹。此時開草堂。山川教兒子。指點洞庭傍。沉芷湘蘭無此悵悵

雨後懷屈子

風雨懷人坐無燈。亦到明流螢分夜色。疎竹聚秋聲。別酒尙餘醉。春花今不榮。終知吾與子。白髮路傍生。

送馬仲融之粵西

天際百重灘。灘邊萬仞山。山風吹落葉。只在客船間。多難

晦冥日。少年離別顏。倚問方白髮。莫不看刀環。海雪華夫之高格

江上

青山此川上。終古見如新。可歎浮生者。蹉跎卽老人。暮雲高不動。白鳥立無鄰。獨往秋光裏。雙槳與病身。

秋晚雜興

冷榻眠無次。閑階立不歸。池花向影落。沙鳥帶聲飛。水畔爲漁父。城東卽布衣。平生隨分得。未覺此心非。三四名句

邊草

勿論榮與悴。今古恨無窮。雪散燒痕上。青歸戰血中。天長垂大漠。地遠後東風。獨有明妃塚。年年似漢宮。沈確士云第四語驚人

秋戍

漢皇猶自將。率土敢言勞。共命惟良馬。餘生託寶刀。侵霜秋柝冷。占氣夜天高。未見功成日。還家已二毛。高岑逸響

送梁器圃歸順德

汀洲初雁飛。送客釣魚磯。故里我曾夢。深秋君獨歸。荻花迎棹起。楓葉到城稀。爲問先人宅。門前柳幾圍。

次鳳陽逢中秋

未到問沽酒。早投城北闔。莫令亡國月。得照渡江人。世薄功名士。秋銷戰伐塵。餘生付樽杓。畱醉上車輪。

冬草

無論南與北。一種白連門。豈不怨遲暮。曾承天地恩。遠風

疎勁葉。春色聚寒根。獨立觀元化。悠悠何所言。

送滌上人

滌公到城久。忽憶邱中琴。積雪迴孤棹。寒湘共此心。獨歸紅樹外。相待碧雲深。借問茅庵路。衡山在隔林。

贈趙童子

拋卻儒冠學論兵。田園荒盡不思耕。終年避地青鞋破。一夜憂時白髮生。松柏本來多直性。英雄何必在成名。憐君困甚還兼病。父執相逢淚滿纓。

懷梁藥亭

昨聞歸棹越黃河。又向維揚渡口過。三月煙花雖寂寞。六朝秋草更如何。高堂待進斑衣舞。下里猶思白雪歌。一第

蹉跎何足歎。貴人傳者古無多。結二句為千古文人不遇者吐氣

同諸子再泛甘溪

停舟昨夜蔭楓林。不道江天便有陰。落木寒皋前路在。斷橋流水此時深。逢山每作終身計。見鴈重驚萬里心。暫抱衾裯就漁父。月明同聽柁歌音。呼泓蕭瑟如鼓邱中之琴

咸陽懷古

關門一夜柳條春。今古茫茫草色新。龍虎片雲終王漢。詩書餘火竟燒秦。瑤池西望猶通鳥。渭水東流不待人。最是五陵遊俠客。年年磨劍候風塵。

蜀中懷古

子規啼罷客天涯。蜀道如天古所嗟。諸葛威靈存八陣。漢

朝終始在三巴。通牛峽路連雲棧。如馬瞿塘走浪花。擬醉昔賢魚水地。海棠開徧酒人家。沈確士云漢高以蜀王後主以蜀亡明眼人可以論古

鄴中懷古

山河百戰鼎終分。歎息漳南日暮雲。亂世姦雄空復爾。一家辭賦最憐君。銅臺未散吹笙伎。石馬先傳出水文。七十二墳秋草徧。更無人表漢將軍。沈確士云表揚才華視奪奸魄最為定論

隋宮懷古

穀洛連淮日夜流。渚荷宮樹不曾秋。十年士女河邊骨。一笑君王鏡裏頭。月下虹蜺生水殿。天中絲管在迷樓。繁華往事邗溝外。風起楊花無那愁。元孝詠古詩最得巧不傷雅之意

送姜山上人遊西岳

送師西去重低徊。會上衡山絕頂來。夏帝碑蕪蟲篆徧。楚天峰斷雁行迴。燈前鬼芋穿沙出。霽後僧門鑿雪開。正是到時二三月。上方明月下方雷。沈確士云奇景得奇語寫出

秋日西郊讌集同岑梵則張穆之陳喬生王說作高望公龐祖如梁藥亭屈泰士時屈子歸自塞上

黍苗無際雁高飛。對酒心知此日稀。珠海寺邊遊子合。玉門關外故人歸。半生歲月看流水。百戰山河見落暉。欲灑新亭數行淚。南朝風景已全非。絕唱

虎邱題壁

虎跡蒼茫霸業沉。古時山色尚陰陰。半樓月影千家笛。萬

里天涯一夜砧。南國干戈征士淚。西風刀剪美人心。市中亦有吹簾客。乞食吳門秋又深。沈確士云極熟題須一洗窠臼此爲得之

新塘早春懷蔡艮若何不偕

春雲漠漠虎頭東。幾日移居杏再紅。三徑草生殘雨後。數家門掩落花中。鄉山久別吟兼夢。水驛多情浪與風。有約扁舟未能去。幽期空負釣魚翁。

江上別盧非玉

重逢又是異鄉行。一月孤帆共北征。江上路分彭蠡澤。雪中人向岳陽城。停舟此地丹楓色。買醉當壚玉笛聲。別後想君歌舞夜。姑蘇南望倍含情。

將發漢口毛子霞在武昌不得更別舟中夜坐作詩

寄之

滄波芳草暮生煙。東望離心倍黯然。短棹擬過黃鵠渡。輕裝催上白門船。遙從江漢分流地。坐到星河欲曉天。明日五更應已遠。故人殘月正高眠。

送魏和公歸寧都

隔年相見卽依依。知爾全家住翠微。窮海訪人兵後去。孤身攜劍雪中歸。灘平橫浦寒流淺。楓照凌江晚葉稀。貧賤別離那可道。寸心齊與片帆飛。

歲暮登黃鶴樓

郊原草樹正凋零。歷歷高樓見渺冥。鄂渚地形浮浪動。漢陽山色渡江青。昔人去路空雲水。粵客歸心向洞庭。莫怨

鶴飛終不返。世間無處託仙翎。

發舟寄港用啮鍾裴仙湛天石

扶胥古渡水淒淒。雨後移舟望轉迷。八口寄居秋草外。一身爲客楚雲西。家無兄弟依朋友。地夾河山畏鼓鼙。知已片言應不負。亂離兒女藉提攜。沈確士云如面訴友朋宛轉關生情文兼至

九日登鎮海樓

清尊須醉曲欄前。高閣臨秋一浩然。五嶺北來峰在地。九州南盡水浮天。將開菊蕊黃如酒。欲到松風響似泉。白首重陽唯有笑。未堪懷古問山川。三四有拔山扛鼎之力

過六貞女墓小序

順德龍津李氏處女也丙辰春粵東大亂有強暴

謀脅致之六女懼不免夜以酒相醉一夕同赴水

死比曉出之明粧儼然臂約紅羅兩兩相結其家

合而葬之龜山之陰當事者立石表之曰六貞女

墓

崑岡生玉總無瑕。列女貞魂是一家。一夕便成千古事。孤墳空與後人嗟。乘鸞合上三珠樹。化雪應爲六出花。處子立名青史少。曹娥江水在天涯。

明妃怨

生死歸殊俗。君王命妾來。莫令青塚草。生近李陵臺。沈確士云韻語中明是非定賞罰居然史筆

夷齊廟

清風千載又誰加。古廟荒壇落槿花。欲薦春薇無處采。西山元已屬周家。

讀秦紀

謗聲易弭怨難除。秦法雖嚴亦甚疎。夜半橋邊呼孺子。人間猶有未燒書。神似玉溪斷句

送屈子

萬里還家着綠衣。三春惆悵別慈闈。期君得似銜蘆鴈。半歲南飛半北飛。

48-12008

